


Eroho Powarya Exeenii?

 ...voorika okhalana muthukumano. Muthukuman'ola ohaana okhala muthukumano woovirikana vakhani n'ye kweekwe sinkhalanak'ahu va. Imaara sinci-ene, khula okathi onthukuman'ahu va, onkhala muthukumano w'o...wo ovonihiwa aretta ni sootthuna s'erutthu. Ti vaavo vanihelaxiwa osulu. Masi ohiy'ula noopacerya muhakalalih'ola wa ovonihiwa wa munepa, e—erooho ya mutthu.

Khula enamuna, Apwiya yatthuna vale, Ttiminku voosiisu, exikola ya Ttiminku, Ttiminku voosiisu, ninrowa okhalana ovekeleliwa w'aretta ni eliinya ntoko silimalenly'ahu ya ovoniha, ya Ttiminku voosiisu, Apwiya yatthuna vale. Nto isumana iya ohiyu, nihaana wo waakuva olavula itthu Sihinimala sa munepa.

² Vano, noosuwela wira okathi e—erutthu envonihiwaaya, enninitteeliha murima hiyo othene, okhala wira noosuwela wira eyo enninooniha voomalela wira Muluku ahu onnaavoniha aretta. Masi mutthu ene yoowo muretta, awo yakhala okathi munci-ene, khino anoowereiwa-tho, khino eretta emosaru yeeyo awo avonihiwaaya, nto eyo khenikumihava ovona. Meetiku onooverya ovaha murette mwaha wo wiipiwa iphumu, nto khino mahiku maili ohoolo waya mutthu onimookhwa mwaha wo wiipiwa iphumu omanleene ohimya wira mukumi. Enoohokolowa-tho. Masi okathi munep'owo onivonihiwaaya, mookhalana nto, mwa nyuwo, Ekumi Ehinimala.

³ Ni kookupali wira hiyo nri vakhiviru ni Orwa w'Apwiya Yesu, wira ennithuna hiyo wira sothene vakhany'ahu oweryaka wira nimuruuhe khula mutthu Momweneni, ni oruuha Omwene w'atthuni, wira niwerye ovonihiwa irooho sahu. Kinnaamini wira erutthu ya Yesu ti erutthu yootepa owereiwa kinsuwel'aka; yeeyo ekhanle, e—erutthu, erutthu ya muroohoni ya Kristu vathi va, khereere owereiwa.

⁴ Nto vano, khanimphavela wookhalihani okathi munci-enexa ohiyu umosa, okhala wira ohiyu woopacerya khanirina opuro wira ekilaathi apatthan'ihu oophenteya. Nirina ethhokiheryo yo oteka ekereja ekina, etapernakulu yuulupale vaava va mapuwa yaala, wala khula nipuro Apwiya anrowaaya weettiherya; masi mpakha sinsuwel'ahu, ti vaava.

⁵ Nto vano noolaleerya muthukumano, Namararu mpakha Ttiminku. Masi nto Ttiminku, anaattamela mahiku a Natale, masi eyo...khula okathi Apwiya annihimeery'aya wira neemele, owo onookhala p'ukathi. Hiyo khaninsuwela oratteene t'ivi sinrowa okhala miphwanyeryo. Masi naaminiki wira athu va mutapernakulu n'ikereja s'oxinn'ihu (sikhhanle, emosa

aya ekhanle—ekhanle etapernakulu ya mowaaryani oUtica, weiwo Munna Graham Snelling okhanly'awe pastore, ni oNew Albany weiwo Munna—Munna Junie Jackson okhanly'awe pastore, nave-tho ephiro yuulupale iwe weiwo Munna Ruddell okhanly'awe pastore), hiyo n'awo, ikereja s'exinna s'etapernakulu ila, niniilipiha wira naaruuhe a...atthu ahu mopatthanani wooreera ni Kristu. Eyo ti yoothuna ahu. Vano koothanla osoma ni wiixuttiha, wa ohiyu ontharelana . . .

⁶ Ohiy'ula kintthuna kilavule mwaha wa: *Eroho Yowarya Exeenii?* Nto meelo ohiyu, kintthuna kilaleerye mwaha wa: *Eyo Evaheeriwe Exeenii?* Ni Namathanu ohiyu...Ni, w'ale ankaravari, nkinthuna ela okaravariwa Namathanu ohiyu: *Kinaakhela Sayi Eroho Yowarya?* ni *Kinsuwela Sayi Okathi Onkhalan'aka Yeeyo?* Vano nto ninoohiya pahi, nto noone etthu Apwiya anrowaaya oneettiherya, ya Saapatu ni Ttiminku. Nto Ttiminku voosiisu, muteko wo ovonihya, ni muteko mukina w'elaleeryo ehapari wa Ttiminku ohiyu.

⁷ Nto vano nintthuna atthu othene esuwele yeeyo...Ni koosuwela wira ikaravatooro sinvara muteko wiithela, ni nintthuna nihimye ela. Okhala wira, mwa mithukumano iya ntoko ola, sa enamuna s'elaleeryo ehapari, nookhalana atthu anikhuma miromolelo soohiyana-hiyana sa ikereja yiixuttihiwe mwa ettharihelo aya yo waamini, khula mmosa. Nto eyo ti yoolikana. Nkinatthuneke okhala oottheka mwaha wo oruuha ovirikanyana eriyari y'axinna. Ni kakhuma vale mmithukumanoni, kinlaleerya paahi Ikeekhai suulupale s'elaleeryo ya Soolempwa, iye anaamini axinna anikhaliherya muthukumano aka. Masi, mutapernakulu mu, ki—kintthuna kilavule ele enaamini ahu. Tivo, nyuwo mwa—nyuwo mwaahisuweleke saana, kaamutthapela waakhela epaphelo yaamukhaani wala yoolepa enikhuma wa nyuwo, mukikohaka yookoha ya—ya mwaha wa xeeni hiyo waaminiki siisa. Ni miyo kaamutthapela wiilipiha wira kileeliherye vooreerexa vansuwel'aka.

⁸ Moosuwela, khula ekereja, mwaahikhalane mwixuttiho, khamuhiyo ekereja. Muhaana okhalana etthu muneemerery'anyu, malamulo kamosa-kamosa munkhalihery'anyu. Ni voohicala opatthana xeeni wala muromolelo xeeni mutthu okhanly'awe, mutth'uwo ayariwaru ni Eroho ya Muluku, owo ti munn'aka mulopwana wala muthiyana, voohicala e...Hiyo pooti ovirikana mwa itthu sikina, ntoko onikhuma nsuwa siry'aya ni onikela nsuwa, masi nlelo n'axinna. Ni nkaarowa wira etthu yoohikhala ophavela omukhaliherya munn'owo wira eetteke, vooreera ni vakhiviru ni Kristu. Ni kinnaamini wira khula, muKristu eeekkhahi aamukiirela siiso miyo.

⁹ Vano, koovekela etapernakulu ila . . . Vano, hiyo khaninkela, mwa yeela wira nikhhalane muthukumano woolekela. Kintthuna

kikele mwa yeela, ni kintthuna wira nyuwo, ni kihoovekelani, wira mpahe khula muthato ori ottuli wanyu, ni muttharuwe khula etampi, okhala wira ninkela mwa yeela ni sothene siri mmurimani mwahu ni makhalelo ahu. Nihaana orwa va ni etthunelo emosa y'okhalaha minepa sahu soolikana wa Orwa w'Apwiya, ni kahi ni etthunelo ekina. Ni ntoko sihimaly'aka khwira, wira khino imaara sikina pooti wiixuttiha wala ohimya etthu yaarowa okhala yoovirikana vakhani n'ile mutthu mukina, enamuna awo anaamini aya. Miyo—miyo nki—miyo nkirwenle ovaanyihana, moone, ki—kinrweela. . . Hiyo niri va wira niitthokiherye Orwa w'Apwiya. Ni kinoona wira nikhuru nla naamukhaani. . .

¹⁰ Kookhalana apatthani kamosa-kamosa annixekurya va kinaasuwel'aka, anikhuma mapuro oohiyana-hiyana, ni hiyo nootthapela okhala ni yaawo. Ni vekeekhai w'alipa-oowiriyana vale, aakhala akina oohikhala a epooma, ankhuma ipooma kamosa-kamosa sikhaani naattamanann'ahu nno. Nto ninnitteeliwa murima okhala ni nyuwo, ni woouxukhurelani, woonaka wira munniniphenta voophiyerya orwa wiwa ithu iya. Muluku. . . Mukuxe murowaka owaani, munn'aka mulopwana, muthiyana, mihakhu s'ethaaciri Muluku okhanly'awe ohelaka mmurimani mwanyu, ti mavekelo aka.

¹¹ Ni wa etapernakulu ila yaamukhaani, kinnoona ni kookupali wira atthu amosa ooreerexa murima kinaamini aka wira ari elapo ya vathi, anrwa etapernakulu ila. Vano, miyo nkihimmye wira "othene" atthu ooreerexa murima. Kihimmye wira atthu kamosa-kamosa ooreerexa murima elapo ya vathi anoorwa etapernakulu ila. Masi nihiku ti nihiku, nitthikaka, muthukumano ni muthukumano, kinnoona otthunaneya wuulupale w'etapernakulu ila, otthunaneya wuulupale mwa yeeyo, ni eyo ti w'osariha, ahiiso ovahererya, makhalelo oowiixeryaxa, weetta vakhiviruxa ni Muluku. Ni miyo kihaalaiherya wira yeela, waaruuwela Mitthaka iya. Ni nootteeeliwa murima wookelihani mu ni opatthana ni hiyo mwa Masu a Muluku, okathi oniixuttihaahu ni ophavela wooniherya.

¹² Vano, ohiyu miraru woopacerya khaninrowa okuxaka mwaha mmosa n'ulaleerya, masi Mutthaka wo wiixuttiha mwa Masu a Muluku.

Nto vano, wa, nkaarowa onvekela mutthu wira etthu kahaarowaaka wira yoomi. Nto esuman'ela enikhala Kalvario oomalela wa miyo. Kinnikhala oohalela o—ohileya, vaakhanle wira kaamuhimya siiso, mpakha ohalela ohiisuwela mmansaka. Masi koovahererya otthuna wothene, ni sothene kinsuwel'aka, w'Apwiya.

¹³ Ohiyu uwo, nuuvira okathi vakhani ohiyu eriyari, amwaar'aka ni miyo, numala ovenya, khuvekela khulavula n'Apwiya, vakhukuluni yaamukhaani mu. . . musaala mwahu

y'ohoolo, ni aBibilia aili ookhunliwa, naahiivahererya-tho wa Muluku, wa muteko woomalela, wira nivahererye otthuna wahu wothene, ni sothene, ni khula muupuwelo woohiloka, ni wira naarumele Apwiya Yesu.

Ni kinroromela wira owo onnikhalaka mweettelo anyu, nave, wira munniiraka etthu emosaru. Vano naarwaaka ohiy'ula, ninrwa ophiya nipuro noowaarya, eriyari y'atthu ankhala avekelaka, n'utthuka, ni ohokoloxa s'aneene, ni okhala oolikana wira mwaakhele etthu enikhuma wa Muluku. Ni koosuwela wira ole onrwa avoliwe-ene khanrowa avoliwe-ene, masi Muluku onoomulyiha ni Yolya y'Ekumi.

¹⁴ Vano, nihinatthi osoma Eliivuru Awe yoowaarya, nrowe nuurame muru ahu okathi vakhani paahi wira nivekele.

¹⁵ Pwiya, aakhala mavekelo avaheriwe nipuro nla ohiy'ula. Sookhala... isipo s'oSiyoni siipiwe n'an'Inyu. Mirima saya soohakalalihiwa. Ni hiyo nihoorwa va wira niivahererye wa Nyuwo, ni wookokhorelani Nyuwo okhuma muhina wa minepa sahu. Ni hiyo niniwuupuxeryani ila Nyuwo, Pwiya, wira Nyuwo moohimya okathi waakilanthe anyu vamwaako munawiixuttiha awiixutti Anyu, "Ooreeriwa t'ale anvoliwa etala ni ntthona mwaha w'exariya, okhala wira anoovona." Nyuwo moohimya eyo, Pwiya. Hiyo ninoorwa ohiy'ula ni mirima sootthukuwa. Hiyo ninoorwa, oovoliwa etala ni ntthona, ni noosuwela wira Nyuwo munommaliherya natiri Anyu.

¹⁶ Okathi omphavel'ahu okhunla makukhu ala oowaarya a Bibilia, wira nisome sookhala-mo mwa Yoola, Eroho Yowarya ekuxe Seiyo ekelihe khula murima. Ni wira Epyo eyo emorele mowaaminini, moowiixerya ni moowaatta onrowa omukumiherya khula natiri Masu amuhimaly'aya. Muniwe, Pwiya, ni munireerihe, ni muneehererye. Nto yaakhanle-ene etthu p'itthu yoonanara ya hiyo, Pwiya, khula etampi yoohilampwa, etthu p'itthu ehikhanle yoolikana, muupulule naanaano va, Pwiya, ninoorowa naanaanoru niire, maana ninnisuwela wira ninkhala mmuuttutthini mwa Orwa wa Pwiya Yesu. Ni nookhalana, O Muluku Oowaarya, nihoorwa mmuuttutthini mwa Yawinyu—exariya Anyu ohiy'ula, ni ninvekela wiiveleela vasya, ni wiivahererya, ni osarihiwa wa Eroho Yowarya mw'ekumini mwahu.

¹⁷ Woonaka wira mooro wa muhakalaliho woopacerya ovukuwa, nirihale-vo ikhuni sa Masu, wira Awo epattihe mooro musya, wira mirima sahu sikhale soosareya wiivaha. Munireerihe, Pwiya, ni Masu Anyu ooreerexa ni Ephome Anyu, ni mahala Anyu, hiyo ninnoovekelani. Ni oxukhuru wothene ni mittotopelo sinrowa okhala Sawinyu. Mukumihe khula muupuwelo w'ethiru mmurimani mwahu. Munirapihe, O Pwiya. Munivahe mirima sooloka, ni murapihe matat'ahu, ni mulokihe miyuupuwelo sahu, wira niwerye okela nipuro Nanyu nooreera,

ohiyu p'uhiyu, nitthapaka ni oosarihiwa Eroho Yowarya. Hiyo ninvekela yeela mwa Nsina na Yesu, ni mwaha wa Yoowo. Amen.

¹⁸ Kintthuna kisome Masu naanaano va. Nto okathi... kinoovekelani wira mwaaruhe aBibilia anyu, ilaapi sanyu, ipaphelo sanyu, mwaha wa Soolempwa. Mwatthuna siiso, yaamukhala yooreera. Nto vano murowelaka kapiitulu 7 ya Miteko, wira nipacerye; wira naakhule, ahiiso opacerya waakhula yookoha: *Eroho Yowarya Exeenii?*

¹⁹ Khiivo hat'etthu enrowa omuxintta Satana, khenatoko okhala etthu mulaponi nave yaarowa okhalakhala emuxinttaka Satana, ntoko Masu a Muluku. Yesu aarumenle Yaawo mukhottoni mw'Awe yuulupale; Owo iirale, "Yoolempwa..."

²⁰ Nto voosiis'ula, okathi waawiriyani'aka, mahiku vakhani avinre, epokrama ya muraatiyuni yaakhala ntoko othuna ohimya wira opattuxiwa okhumme paahi muhina mw'ettheke yaatakanxale ittuurwa kamosa-kamosa, ni efosfaatu vakhani, ni ikiimiku vakhani sa vathi, nto mirayi sa nsuwa nooviha khupattuxa eropo y'ekumi vano khuruuha ekumi. Etthu y'ethiru! Okathi, mirayi sa nsuwa simpwetexaaya khula eropo y'ekumi. Muhiye eropo vansuwani, nlo nnimwiiva eyo naanaanoru. Ni khiivo etthu ene eyo; masi Satana aathuna okivaha nlaathuma ni yeeyo. Nto numala omuroiha Rebekah aka mwaamukhaani oxikola voosiis'ula, nto mphironi kihokolowaka, kipacerya-tho omulikari raatiyu; ni koono wira kaamutthikela-tho okela mwa yeeyo, tivo kitthikela omutthuka.

Nto okathi waarowaaka mphironi, Satana khukiirela, owo khwira, "Moosuwela wira Mutth'ula munimwiitthan'anyu Yesu aari mutthu paahi ntoko, nihiku nimosa mwa nihiku Nawe, ntoko Billy Graham wala Oral Roberts. Owo aari mutthu paahi atthu vakhani yaapaceny'aya omuthukumanela Yoowo ni ohimya wira Owo aari Mutthu muulupale, nto okathi vakhani Owo khukhala muulupale, vano nto Owo khukhala mu—muluku w'awo. Nto vano yoomwaramwareya mulaponi mothene, okhuma okathi Owo okhwiyaawe, nto vaamala."

²¹ Miyo kuupuwela, "Moota mury'anyu nawoothe!" Vano nto kirukunuwa naanaanoru okathi waatuphaaka Ephiro Graham. Miyo khwira, "Satana, nyuwo munlavula ni muupuwelo aka, kaathuna kookoheni itthu kamosa-kamosa. Aari pani ule maprofeta aHeperi yaamuhimy'aya wira aamurowa orwa? Aari pani Mesiya oottikittheliwa? Exeeni yaari mw'axilopwana ale yaamoonale Yoowo khalayi ene khuhimya makhalelo Awe, iyaakha ikonto sene Owo ohinatthi orwa mu? Aari pani aahimale khalayi ene voolikana? Nto okathi Owo orwiiy'awe, awo yiirale, 'Owo aahaalikeliswa vamosa n'atakhali,' ni Owo aahikhala. 'Owo onyakatteliwe mwaha wa sootakhala sahu,' ni Owo aahinyakattiwa. 'Owo oovithiwa poromosa ni thaaciri, masi Owo aamuhihimuwa, mmurotoni mwaya,' nto Owo

aahihimuwa. Vano Owo aahilaiherya Eroho Yowarya, ni miyo kookhalana. Tivo vanreerela mukhume murowaka ottaiwene wa Yeeyo, okhala wira yoolempwa mwa Masu, ni Masu othene t'ekeekhai." Vano owo khukhuma. Munvahe Masu paahi, eyo enoophiyerya. Owo khonwerya ovilela Masu awo, okhala wira Awo t'owuupuxeriwa.

Nrowe nipacerye osoma ohiy'ula ekapiitulu 7 y'Eliivuru ya Miteko.

Nto mukhulupale a anamukuttho aahihimya wira, Itthu iya ekeekhai?

Nto owo aahaakhula wira, Alopwana, n'axinna, n'axitiithi, nviriyane; Muluku a nttittimiho aahimukhumelela tiith'ihu Abrahamu, okathi waaryawe oMesopotamia, ohinatthi orowa okhala oHarani,

Ni aahimuhimeerya wira, Mukhume mulaponi mwanyu, ni mweemusini mwanyu, murowe elapo Miyo entthun'aka woothoonyeryani.

Siiso owo aahikhuma elapo yoKhalteya, khurowa okhala oHarani: okhuma vaavo, numala okhwa atiith'awe, owo aahimurwana elapo ela, nyuwo enkhal'anyu vano.

Nto owo khaanvanhe yoohalana memmo, nnari, nnakhala nipuro naamukhaani: nto owo aahimuroromeliha wira aarowa onvaha wira ekhale yawawe, ni osuulu awe nuumala owo, okathi ir'awe nlelo ahiyanre.

...Muluku aahihimya, Wira osuulu awe waarowa okhala mulaponi mw'axineene; ni wira yaarowa okhalihwa ipottha, ni ohaaxiwa mpakha iyaakha imiya xexe.

Muluku aahihimya, Miyo kinoohukhumu elapo enrowa waakhaliha ipottha: numala anookhuma, ni anoookirumeela elapo yeela.

Vano owo aahinvaha waataana wa olyihiwa masoma: tivo Abrahamu aahimuyara Isakhi, khumulyiha masoma nihiku na neethanu neraru; nave Isakhi aahimuyara Yakope; nave-tho Yakope aahaayara axitiithi muloko nanli.

²² Vasulu va nipuro nla, nintthuna okelela mwaha, kinuupuwel'aka wira ti mwaha muulupale w'olelo, wa e...Eroho Yowarya Exeenii? Exeeni Iyo? Nto, vano, etthu ekuxenry'aka mwah'ola voottharana siisa, khamukhanle orwa ni waakhela Eroho Yowarya muhikhanle wira munoosuwela exeeni Iyo. Ni khamukhanle waakhela Eyo, mwasuwela vale wira exeeni Iyo, muhikhanle wira munimwaamini wira munnivahiwa,

ni wira Eyo ti yawinyu. Vano, nto, khamukhanle osuwela sinto muhaana Yeeyo, wala nnari, muhikhanle wira munoosuwela iphwanyeryo Eyo eniruu'aya. Vano mwasuwela vale exeeni Iyo, ni wira ti yawani, ni miirelo xeeni Eyo eniruu'aya okathi enrwaaya, vano munoosuwela etthu murin'anyu okathi munaakhel'anyu Yeeyo. Munnona? Eyo enoomaliha mwaha.

²³ Siiso ntoko kaalavul'aka ni Munn'ihu Jeffries olelo, nto owo khwira, "Kaanitthuna okhala vamuthukumanoni olelo ohiyu, masi kinookhala weiwo meelo ohiyu." Owo khaasuwela wira muthukumano onimwiiraneya, okhala wira khanaahimiyale; vaava va paahi. Amosa-amosa wa... Munna Leo n'akina yaahaalepela ipaphelo apatthan'ihu kamosa-kamosa khwaahimeerya, ale ahikhanle a mpooma. Ahe, okhala wira khanaarina opuro.

²⁴ Vano miyo khwira, "Munna Jeffries, mwaakirumme orowa ovaraha muteko emosa wa ihimye sanyu sa patarootya, nave nkaasuwela etthu ya yeeyo, alakela kaamupattiha. Khino kaamuhula muhulelo ohikhanle wala otthukula mutooro ohikhanle. Kaahaana osuwela moota wo wira kihinatthi wira."

Nto ti siiso siry'aya waakhela Eroho Yowarya. Muhaana osuwela etthu munirweel'anyu, ni moota wo waakhela Yeeyo, ni etthu ekhanly'aya.

Vano, voopacerya, Eroho Yowarya yoolaiheriwa.

²⁵ Naamuwerya okuxa isumana muloko ni nnakhala... otupha paahi vasulu v'orere wa mwah'ola, ele ekhanle Eroho Yowarya. Masi, voopacerya, kintthuna kikelele voophiyerya othoonyerya vakhani khula ohiyu, vano woona ohiyu ontharelana vakhala wira sookhala sookoha.

²⁶ Akavi mu ahaakhanle Eroho Yowarya, ahipatisiwe ni Eroho Yowarya? Nvenxe matata; nyuwo munuwela wira khamupatisiwe. Nkawehani matata paahi.

Vano kintthuna kilavule Yeeyo, Eroho Yowarya ntoko ethoonyeryo, maana Eyo ethoonyeryo. Hiyo ninnisuwela eyo, wira anatiri othene ninvahiwa ni... Abrahamu aari tiithi a natiri, okhala wira Muluku aahimmanela natiri Abrahamu ni Osuulu awe numala owo. Natiri aamaneliwe "Abrahamu ni Osuulu awe." Nto ethoonyeryo ela ti y'atthu ari mowaataanani.

²⁷ Vano, wookhala ovirikana wuulupale eriyari ya muKristu paahi ni muKristu osareiyee Eroho Yowarya. Nto vano ninrowa ophwanya ela mwa Soolempwa, okhaliha oratteene mwa Soolempwa. Yoopacerya, ookhala muKristu onihimya okhala muKristu. Masi vakhala wira muKristu ula nlelo khosareiyee Eroho Yowarya, owo nlelo ori mphironi w'okhala muKristu. Munnona? Owo onihimya wira onnaamini Iyo; owo onoorowela Yeeyo, masi Muluku khonatthi onvaha nlelo Eroho ela, ya Eroho Yowarya. Owo nlelo khonaphiyerye mukaan'owo ni Muluku, wira Muluku oolipiherya.

28 Okhala wira, wira, Muluku aapanke waataana n'Abrahamu, nuumala Owo omwiihana Abrahamu, yeeyo ekhanle enamuna emosa yo wiihaniwa mulipa-oowamini olelo.

Owo aahimwiihana Abrahamu, nto Abrahamu khukhuma elapo awe khurowa elapo y'amalapo, okhala n'atthu amalapo, nto eyo yaari ethoonyeryo ya okathi Muluku onimwiihan'awe mutthu wira ahiye otakhala wawe murima, attharuwe etampi awe. Owo onookhuma nto nikhuru aary'awe-mo, wira akhaleke nnikhuru nsya, eriyari ya enamuna esya y'atthu.

Vano nto Muluku voonaly'awe wira Abrahamu aari oororomeleya mwa natiri Muluku aanvahaly'awe, wira owo aarowa okhalana mwaana, ni wira mwa mwaana yoola elapo yothene yaamureerihwa, vano Muluku aahilipiherya waamini wawe anvahaka ethoonyeryo, nto ethoonyeryo eyo waari olyihiwa masoma. Nto olyihiwa masoma ti ethoonyeryo ya Eroho Yowarya.

29 Vekeekhai iversiikulu sinttharelana s'ekapiitulu ila nimanly'ahu osoma, mwatthuna vale olepa. Ni e... Sitefano iirale, eversiikulu 51:

*Nyuwo oolipa murima . . . oohinnuwiihiwa mmurimani
ni mmaaruni, nyuwo munikhootta Eroho Yowarya:
ntoko siiraly'aya axitiith'inyyu, siiso muniir'anyu
nyuwo.*

30 Olyihiwa masoma ti ethoonyeryo ya Eroho Yowarya. Nto Muluku aahinvaha Abrahamu e—ethoonyeryo y'olyihiwa masoma vaamanly'awe omukupali Muluku mwa natiri Awe ni khukhuma arowaka elapo y'amalapo. Munnona? Yaari ethoonyeryo.

Nto an'awe othene, ni osuulu awe nuumala owo, waahaana okhalana ethoonyeryo ela v'erutthuni vaya, okhala wira yaari evirikanelo. Yaari wira yaavalaanye awo n'atthu akina, ethoonyeryo ya olyihiwa masoma.

31 Nto ti yeeyo Muluku onrumeel'awe olelo. Ti ethoonyeryo ya olyihiwa masoma ya mmurimani, Eroho Yowarya, enikhaliha Ekereja ya Muluku Ekereja yoovalaanyana ni iyaaminelo sikina sothene, itiini ni miromolelo. Awo ari muhina wa mithinto sothene sa miromolelo, masi nnakhala vo awo atthu oovalaanyiwa. Mukihiye kilavule ni mutthu minuutu miili, kinoowerya wooleelani sinto ohaakhela Eroho Yowarya wala nnari; ni nyuwo munoowerya. Eyo ennaavalaanya. Eyo ekanyeryo. Eyo ethoonyeryo. Ni Eroho Yowarya ethoonyeryo. Ni eyo . . .

Khula mwaana aakhootta olyihiwa masoma Waataana Wa Khalayi, yeeyo yaari eruku ya Eroho Yowarya, aamukumihwa eriyari y'atthu. Khaarowa okhalana opatthana ni muthukumano mukina, akhootta-ru olyihiwa masoma.

Vano mulikanyihe yeeyo n'ulelo. Mutthu aarowa okhootta waakhela opatiiso wa Eroho Yowarya, khokhanle okhalanaka opatthana eriyari y'ale arina Eroho Yowarya. Khamukhanle wira tu. Muhaana okhalana mukhalelo. Ntoko, eyo. . .

³² Ame aka yaanihimyaka, "Axipalame a mapururu oolikana aneetta vamosa." Ahe, nlo nlikanyiho na khalayi, masi ti n'eekkehai. Khamunoono ipompa n'anakhuku epatthanaka. Olya waya ti woovirikana. Mihapo saya ti soovirikana, Sootthuna saya ti soovirikana.

Ni ti siiso ery'aya mulaponi nave ni muKristu okathi munkhal'anyu *ooliyihiwa masoma* ni Eroho Yowarya, yeeyo enihimya, "othikila khukumihya ethayi."

³³ Olyihiwa masoma waaweryaneya okhala mwa mulopwana paahi. Masi muthiyana atheliwa ni mulopwana, owo aari mpantte wa yoowo, owo aahilyihiwa masoma n'owo. Muupuwele, mwa Timoteyo, vaavo Eyo ehimmy'aya mmo wira, "Muthiyana onimooopowa mwaha w'okhala maama, aakhalelakeru nthiti waamini n'ureera murima ni wiisumaaliha wothene."

³⁴ Vano, olyihiwa masoma. Moosuwela okathi...Sara aatheyal'awe muheemani ottuli wawe, nto mutthaka wa Nlaikha, okathi Nlo niiraly'aya, "Abrahamu," ahisuwelaka wira aari pani, mmalapo, "amwaar'inyu ari vayi, Sara?" Owo aasuwenle sayi wira aahikhalana mwaara?

³⁵ Ntoko sihimaly'awe Yesu, "Siiso saary'aya mahiku a Lothi, vanimwiiraneya siiso nihiku n'orwa wa Mwaana a mutthu." Muupuwele, ithoonyeryo iye khisaapakiwe oSotoma ni Komora, mulaponi, varyari v'anatiini. Masi yaari w'ale Oothanliwa, oowiihaneliwa okhuma. Nto Abrahamu aari oowiihaneliwa okhuma. Vano nuulumo *ekereja* nnihimya "oowiihaneliwa okhuma; oovalaanyiwa," ntoko Abrahamu iivalaanyaly'awe ni aahaana olyihiwa masoma.

Vano nto okathi Sara otheiy'awe mutthaka ene yoowo wa Nlaikha, Muluku aamurowa omwiiva vaavale vene; masi Owo khaakhanle omuhaaxaka Sara ahimuhaaxale Abrahamu, okhala wira awo yaari mmosaru. Owo aari mpantte awe. "Nyuwo khamunkhala-tho anli, masi mmosaru."

³⁶ Tivo, olyihiwa masoma, Eroho Yowarya olelo enilyiha masoma murima. Vano eyo ethoonyeryo, ethoonyeryo yoovahiwa.

Mutthu mmosa iirale nihiku nlo...miyo kinootthikela paahi ila, kahi ntoko eperwa. Okhala wira, eyo ekeekhai, masi eniiweya ntoko eperwa. Ntoko sinihimyak'aka imaara sinci-ene, nla khanihiyo nipuro na iperwa. Masi aahikhala mutthu mmosa a wAlemaanya Olimani Onkela nsuwa wu, weiwo naary'ahu-wo naanaano. Owo aakhenle Eroho Yowarya. Vano owo aamurowa attharaka ephiro, vano owo aamweetta

vakhani, n'ufenxa matat'awe n'ulavula ilavulelo. Aamutthyawa, n'utupha, n'unyakula. Vano owo aari omutekoni, airaka siiso, vano mukhulupale awe khumwiirela, "Mwaari vayi?" Uh-huh. Okisivela mapuro awo mwaary'anyu. Owo khwira, "Tthiri siiso mwaakhanle eriyari ya nikhuru nle na ipooroka [Enkelesi "nuts" enihimya ipooroka ni alolo—Mot.]."

Owo khwira, "Vano nyuwo munoona wira iye ipooroka?"

Owo khwira, "Tthiri, ti seiyo."

³⁷ Owo khwira, "Ahe, attottopeliwe Apwiya mwaha wa ipooroka!" Nto owo khwira, "Moosuwela? Ipooroka sinnivara muteko muulupale." Owo khwira, "Mwa nlikanyiho, ekaaro, mwakumiharu ipooroka sothene, khamunhalana etthu woohikhala nikuttha na 'nikwakwara.'" Vano eyo ekeekhaii.

³⁸ Munikhala oovirikana Eroho Yowarya yarwa mwa nyuwo, mpakha muupuwelo w'atthu olumwenku ula ohinsiveliwaaya ni nyuwo, vano awo ankhala owoovirikanyani, ni khankhala nnaata ni nyuwo, hata vakhani. Nyuwo muniyariwa Olumwenku mukina. Nyuwo munikhala mmalapo, imaara muloko ovikana saarowaanyu okhala, vaakhanle wira mwaarowa mapuro oorekamaxa-wo a itakhwa sa wAfrika. Nyuwo munikhala oovirikana okathi Eroho Yowarya enoorwaaya, nto Eyo ethoonyeryo. Eyo ekanyeryo varyari v'atthu.

³⁹ Vano, nyuwo muniira, "Vano, Munna Branham, ethoonyeryo eyo ya olyihiwa masoma aavahiwe Abrahamu?" Eyo ekeekhaii. "Ni Osuulu awe?" Ayo.

⁴⁰ Vaareera, vano ninrowa okhunla aKalasiya, kapiitulu 3, versiikulu 29, noone moota eyo vakhany'aya oheleliwaka hiyo. aKalasiya 3:29, noone paahi moota olyihiwa masoma nno vaakhanly'aya oheleliwaka Mmalapo, vakhala wi hiyo n'Amalapo; yeeyo, nikhany'ahu mwa eyareliwo y'ephattu.

Vano, yoopacerya, kintthuna kisome versiikulu 16.

Vano nto Abrahamu ni osuulu awe yaahilaiheriwa natiri. (Abrahamu ni osuulu awe!) Owo khahimye wira, Ni osuulu, . . .

Kahi mutthu ti mutthu a . . . oniira, "Oh, miyo ka osuulu w'Abrahamu, nave." Nnari. Wa "Osuulu," mmosa Osuulu w'Abrahamu!

. . . Kahi osuulu aya, ntoko atthu anci-ene; masi ntoko mmosa, Ni wa—wa ale . . . Ni osuulu anyu, yoowo okhanle Kristu.

⁴¹ Kristu aari Osuulu w'Abrahamu. Munnaamini yeeyo? [Muthukumano oniira, "Amen."—Mol.] Vaareera, vano nrowe nikuxe versiikulu 28 ni 29.

Khaavo muYuta hata muKreku, nnakhala khaavo epottha wala ootaphuwa, khaavo hata mulopwana wala

muthiyana: maana hiyo othene niri mmosaru mwa Kristu Yesu.

Nto mwaari atthu a Kristu, vano nyuwo mwa Osuulu w'Abrahamu, ni mw'atthu oohiyeriwa ntoko saaromelinhawe.

Nimphiyerya sayi okhala “Osuulu w'Abrahamu”? Mwaha w'okhala mwa Kristu, vano na Osuulu w'Abrahamu. Vano t'uvi waari Osuulu w'Abrahamu? Ntoko, naamuwerya orowa mwa aRooma 4 ni mapuro oohiya-hiyana.

Abrahamu khaamwaakhenle natiri ary'ene oolyihiwa masoma. Wi yooniherye wira olyihiwa masoma yaari ethoonyeryo paahi, owo aamwaakhenle natiri *ohinatthi* olyihiwa masoma. Nto eyo yaari ethoonyeryo, yo okupaliwa waamini wawe wira owo aahikhalana ohinatthi olyihiwa masoma.

⁴² Vano, hiyo nakhala mwa Kristu, ninkhala Osuulu w'Abrahamu ni n'atthu oorithi vamosa ni Kristu, tivo, voochicala wira n'ani, muYuta wala Mmalapo.

Nto, “Osuulu w'Abrahamu,” Osuulu w'Abrahamu orina waamini w'Abrahamu, ommukuxa Muluku mwa Masu Awe. Voochicala sinto Awo ankhala ntoko ootheiha, ohilimaleleya xeeni muniir'anyu, moota xeeni Awo aniwiirihaayani okhala oomeekha, nyuwo mmukuxe Muluku mwa Masu Awe voochicala etthu p'itthu.

⁴³ Abrahamu aarina iyaakha miloko mithanu na miili ni thanu, ni Sara miloko mithanu na mosa ni thanu, khimukuxa Muluku mwa Masu Awe, ni khwiihana etthu p'itthu yaavirikanne n'Awo ntoko yahaakhanle. Exeeni munuupuwel'anyu wira mameetiku yaahuupuwela, a mahiku ale? Munuupuwela wira atthu yuupuwenle exeeni, okathi yaamoonaly'aya mulopwana mutokweene, a iyaakha miloko mithanu na miili ni thanu, eettaka amuttotopelaka Muluku, wira aarowa “okhalana mwaana” n'amwaar'awe, n'awo iyaakha miloko mithanu na mosa ni thanu, sivinreene iyaakha soophiyaka miloko miili ohinye-ene woona mweeri? Masi, moone, eyo enniwiirihani nyuwo wira vootheiha, waamini w'Abrahamu.

⁴⁴ Nto okathi munlyihiwaanyu masoma a Eroho Yowarya, Eyo eniwiirihani etthu yeeyo. Eyo eniwiirihani wira itthu mwahupuwelel'anyu wira mwaamwiira. Eyo enniwiirihani omukuxa natiri a Muluku ni omwaamini Muluku.

⁴⁵ Vano, Eyo tho, ohiya okhala na—natiri ni ethoonyeryo, Eyo tho ekanyeryo. Vano mwarowa ni miyo mpakha mwa aRooma. Yoopacerya, kinthuna nrowe ni miyo mwa aEfeso 4:30, nto nisome va minuutu mmosa paahi. aEfeso 4:30 anihimya ela.

Vano, nyuwo moowiiwa atthu anci-ene ohimya wira itthu soohiyana-hiyana pooti okhala ikanyeryo. “Mwaarowaka mukereja, murina ekanyeryo ya ekereja.” Nto atthu akina aniira,

“Onkhala otthariha nihiku khata, nihiku n’esaapatu, eyo e—eyo ekanyeryo ya Muluku.” Akina aya aniira, “Naitakanxaru muromolelo khata, nootthittiwa ekanyeryo Momweneni mwa Muluku.”

⁴⁶ Vano, Bibilia ohimmeye wira, “Moolumo othene a mutthu t’owootha, ni a Muluku ti Ekeekhai.” Vano, aEfeso 4:30 anihimya so:

*Muhiriipihe murima Eroho ya Muluku, yeeyo
mutthittiwaanyu ekanyeryo mpakha nihiku no
woopoliwa.*

⁴⁷ Kinrowa okhala oolipiheryaxa vakhani yeela vano, wooniherya. Vano, nyuwo axinna anamatthariha ikano mmaale vakhani paahi. Munnona? Mooweha okathi xeeni ekanyeryo eyo enlekel’aya? Kahi mpakha muhakalaliho mukina, mpakha okathi mukina etthu enivonyey’aya. “Mpakha nihiku no woopoliwa wanyu,” owo p’ukathi munkhal’anyu mutthittiweene ekanyeryo. “Mpakha nihiku no woopoliwa wanyu,” okathi onvuluxiwaanyu nwelaka wira mwakhale ni Muluku, owo p’ukathi Eroho Yowarya enoottitt’ayani ekanyeryo. Kahi okhuma muhakalaliho mpakha muhakalaliho; masi okhuma Ehimalelo mpakha Ehimalelo, munitthittiwa ekanyeryo ni Eroho Yowarya.

Ti yeeyo ekhanle Eroho Yowarya, Eyo ekanyeryo ya Muluku, wira Owo oophwanya. . . nyuwo moophwanya mahala vamaithoni Vawe, ni wira Owo onnoophentani, ni Owo onniwaaminini, ni wira Owo oohela ekanyeryo Awe mwa nyuwo. Ekanyeryo exeenii? Khula mutthu. . . Vano, *ekanyeryo* enthoonya ahiiso enihimya “muteko omalihiwe.” Amen. Muluku oowoopolani, ohooreerihani, ohoolokihani, oophwanya ocaliwa ni nyuwo, ni ohootthittani ekanyeryo. Owo oomalaha. Nyuwo mwa mureerelo Awe mpakha nihiku no woopoliwa wanyu. Etthu *yoothittiwa* ekanyeryo enkhala “etthu emalihiwe.”

Eroho Yowarya exeenii? Ethoonyeryo. Ninoorowa okela mwa yeeyo okathi vakhani ohoolo, Mutthaka mukina, ethoonyeryo Paulo ohimaly’awe. Ilavulelo saari ethoonyeryo y’alipa-oowaamini, ahiiso, oohaamini.

⁴⁸ Vano nwehe, masi, mwa yeela, Eroho Yowarya ethoonyeryo. Kinihimya. . . Nto Eroho Yowarya ethoonyeryo. Eyo ethoonyeryo wira Muluku ohaavaha an’Awe oothanliwa. Okhotta Yeeyo, okumihiwa mw’atthuni; nto waakhela Yeeyo, onkhala omalamala ni olumwenku ni itthu sothene sa molumwenkuni, ni okhala mureerelo Muluku ohenly’awe ekanyeryo y’ekupalelo.

⁴⁹ Miyo kaanivaraka muteko muxipooroni nno ni Harry Waterberry, nto naanirowaka iwe opakhirela evakawu. Muhim’aka, Doc, eemenle ottuli iwe, onnikhaliherya opakhirela ivakawu. Evakawu yaapakhireliwaka, enoowehawehiwa evakawu iyo, mulipa-oowehaweha, nto owo aphwanyaru etthu

etaphunwe, vaavo vaarowaaya omora khuhononeya, wala etthu yaarowa ophweeya; owo khonrowa otthitta ekanyeryo evakawu iyo mpakha emalele osarya, mpakha esarye ni voolikana, wira ottikinyeya wa mukwaha ehihaaxe mureerelo ori muhina.

⁵⁰ Mwaha wa yeeyo imaara sinci-ene ehinkhal'ahu ootthittiwa; khaninreere otaphuwaswa mwaha wa itthu. Okathi Mulipa-oowehaweha onivir'awe, wira awehawehe makhalelo anyu, wira oone vakhala wira khamutaphunwe vakhani paahi mwaha wa itthu, otaphuwa vakhani mwaha wa makhalelo a mavekelo, otaphuwa vakhani mwaha wa mukhalelo w'oviruwa, otaphuwa vakhani mwaha wa nlumi nlo, waalavula akina, Owo khonrowa otthitta ekanyeryo evakawu. Mihapo kamosa-kamosa soonanara, itthu kamosa-kamosa sootakhala, muupuwelo w'ethiru, Owo khokhanle otthittaka ekanyeryo evakawu.

Masi Owo aphwanyaru itthu sothene voopuroni vaya, Mulipa-oowehaweha, nto Owo onootthitta. Ahikhale mutthu oneererya otthukula ekanyeryo eyo mpakha evakawu iyo ophiya onerowaaya weiwo ethitteriwaaya-wo! Eyo vo. "Muhaahaaxe oothanliwa Aka; muhiwiireleke sootakhala maprofeta Aka. Tthiri kinooleelani wira, oreera waya mutthukweleliwe nxilo nuulupale muxikoni, muriheliwe mphareya eriyari, ohikhanle weererya omutthekiha wala omuttikinya mmosa w'axikhaani ala atthittiwe ekanyeryo." Munnoona enihimy'aya?

⁵¹ Ti yeeyo ekhanle Eroho Yowarya. Ti nvarelelo anyu. Ti mukhapelelo anyu. Ti namoona anyu. Ti ekanyeryo anyu. Ti ethoonyeryo anyu, wira, "Kinneetta kirowaka Wirimu. Voohicala etthu xetwani onihimy'awe! Kineetta kirowaka Wirimu. Mwaha wa xeeni? Owo ookitthitta ekanyeryo. Owo ookivaha Yeeyo. Owo ookitthitta ekanyeryo Momweneni mw'Awe, nto kinrowa Movuwani! Ittheke sinarumaru, Satana aireke etthu entthun'awe. Muluku ookitthitta mpakha nihiku no woopoliwa waka." Amen! Ti yeeyo ekhanle Eroho Yowarya. Oh, mwaahaana otthuna Yeeyo. Nkaakhanle otthikela siisa kihirina Yeeyo. Vaakhanle wira kaaniwerya ohimiyaxaxa ya yeeyo, masi kookupali wira moosuwela enihimy'aka.

⁵² Vano, nave-tho, nrowe nimukhunle Yohani 14, minuutu mmosa paahi. Okisivela Masu paahi! Awo ti Ekeekhai.

⁵³ Vano, Eroho ya Muluku, Eroho Yowarya, exeeni Eroho Yowarya? Ti Eroho ya Kristu mwa nyuwo. Vano, nihinatthi osoma, kaatthuna kihimye moolumo kamosa-kamosa oolakiherya va. Eroho Yowarya exeenii? Eyo ekanyeryo. Eroho Yowarya exeenii? Owo mwaataano. Eroho Yowarya exeenii? Eyo ethoonyeryo. Eroho Yowarya exeenii nto? Eyo e. . . Eroho ya Yesu Kristu mwa nyuwo. Munnona? "Woohala-tho okathi vakhani," ohimye ti Yesu, "atthu a molumwenkuni khanikoona-tho Miyo; nave nyuwo munookoona, maana Miyo kinookhala ni

nyuwo, hata mwa nyuwo, mpakha omala olumwenku.” Eroho ya Muluku Mukereja mw’Awe!

⁵⁴ Mwaha wa xeeni? Owo oniiriha exeenii? Ola mwaha wa meelo ohiyu vakhani. Masi Owo oniiriha exeenii? Mwaha wa xeeni Owo, xeeni Eroho Yowarya. . . Exeeni, Eyo erwenle exeenii? Eyo erwenle exeenii mwa nyuwo, Eyo erwenle exeenii mwa miyo? Waari okelela ohoolo miteko sa Muluku.

⁵⁵ “Miyo kweekwe kinvara ele enaasivela Atithi Aka. Nkirwenle wira otthuna Waka yoomi, masi Atithi akirumme. Vano Atithi akirumme ari ni Miyo; nto siiso akirumm’aya Atithi Aka, ni Miyo kinimoorumani.” Oh, wulu! [Munna Branham ommana ikuphi vaara vanli—Mol.] Atithi yaamurumme, yaari mwa Yoowo. Atithi yaamurumme Yesu jaarwiiye mwa Yoowo, khuvara muteko mwa Yoowo.

Yes’uwo onoorumani, onrowa ni nyuwo, ni ori mwa nyuwo. Nto vakhala wira Eroho ele, ekhalaka mwa Yesu Kristu, yaahimwiiriha Owo wira ni opaka enamuna Owo iir’awe, munookhalana muupuwelo wa moota Eyo enrowaaya wira Eyo yakhalaru mwa nyuwo, ’okhala wira Ekumi ile khekhanle orukunuwaka. Enoorowa okhuma erutthu mpakha erutthu, masi Iyo khekhanle orukunuwaka mukhalelo Aya, maana Eyo Mulukuu.

⁵⁶ Vano mwa Yohani 14, nrowe paahi nisome vakhani paahi, opacerya versiikulu 10.

Khamunaamini. . . wira Miyo kiri mw’Atithi, ni wira Atithi mwa miyo? miteko. . . masu kinoohimeeryakani kahiyo Awaka: masi Atithi ankhala mwa miyo, t’anvara miteko saya. (Muupuwele yeeyo vano.)

Mukaaminiki wira Miyo kiri mw’Atithi, ni Atithi mwa miyo: ahiiso mukaamini mwaha wa miteko siniir’aka.

Vekeekhai, vekeekhai, kinooleelani wira, Ole onikaamini, miteko sinvar’aka owo. . . nave-tho; ni onoovara miteko suulupalexa ovikana iya; maana miyo kinrowa w’Atithi aka.

Khamunoona? Munnoona moota Owo ohimaly’awe vo? Vano nwehe ela, moota enkhumel’aya ela. Kinootthikela kisomaka vakhani paahi. Ninrowa osoma mpakha versiikulu 20. “Ni etthu p’itthu envekel’anyu mwa. . .” Nrowe noone, kaahikhalana e. . . Ayo. Uh-huh. Ekeekhai.

Nto etthu p’itthu envekel’anyu mwa nsina naka, kinoowiirelani, wira Atithi evuwihwiwe mwa Mwaana.

Mwavela etthu p’itthu mwa nsina naka, Miyo kinimwiira.

Nyuwo mwaakiphentaka, munimweettela sooruma saka.

Vano miyo kinimwaavekela Atithi, (vano nwehe) nto awo animoovahani Mulipa-ookhaliherya mukina, wira akhaleke ni nyuwo mahiku othene;

Eroho yekeekhai; yeeyo olumwenku ohinweryaya waakhela, okhala wira khunoona, nakhala khunsuwela: masi nyuwo munnisuwela; okhala wira eri ni nyuwo, ni enrowa okhalaka mwa nyuwo.

⁵⁷ Nto Eroho eyo ti pani? Eroho Yowarya exeenii? Ti Kristu mwa nyuwo. Mulipa-ookhaliherya, eyo ti Eroho Yowarya. “Nto Mulipa-ookhaliherya arwa vale, Owo onrowa wiraka itthu imosaru Miyo kiiraly’aka okathi Mulipa-ookhaliherya ory’awe mwa Miyo. Miyo kinimwaavekela Atithi, nto Awo animoovahani Mulipa-ookhaliherya ola. Nyuwo munnimusuwela Mulipa-ookhaliherya. Olumwenku khommusuwela Owo, khunkhalakhala omusuwelaka. Masi nyuwo munnimusuwela okhala wira Owo onkhala ni nyuwo vano,” Yesu alavulaka, “masi Owo onookhala mwa nyuwo.” Owo vo, owo ti Mulipa-ookhaliherya, “onrowa okhalaka mwa nyuwo.”

Miyo nkinoohiyani ntoko ikwaasuni: kinimoorweelani.

“Miyo nki . . .” Vano, owo ti Mulipa-ookhaliherya, Kristu. Ti yeeyo ekhanle Eroho Yowarya, ti Kristu.

Woohala okathi vakhani, nto atthu molumwenkuni khanikoona-tho; masi nyuwo munookoona: okhala wira miyo ka mukumi, nyuwo . . . akumi-tho.

⁵⁸ Oh, naamuwerya okelela ohoolo nikelalaka; masi, wira musuwele. Owo exeenii? Owo ti ekanyeryo. Owo ti ethoonyeryo. Owo ti Mulipa-ookhaliherya. Munnoona sothene Owo okhanly’awe? Osuulu w’Abrahamu murithi Yeeyo.

⁵⁹ Vano nrowe-tho noone wira e . . . etthu ekina Mulipa-ookhaliherya okhanly’awe. Nimurowele Yohani Oopacerya 16:7, noone sinto Owo kahiyo Mulapeli, nave-tho. Munnisuwela xeeni okhanle mulapeli, onlapela. Nookhalana Mulapeli. Nyuwo noosuwela eyo. Yohani Oopacerya kapiitulu 16 . . . Oh, nweherye vakhani, kileveleliwe. Yohani Oowaarya, ti 16:7. Kileveleliwe. Kileveleliwe mwaha w’ohimya yeeyo. Kiroosoma voovonyeya mwawaka . . . kirina 16:7.

Vano miyo kinooleelani ekeekhai wira; Vanoorerelani miyo orowa: tthiri miyo kaahroweru, Mulipa-ookhaliherya khanrwa mwa nyuwo; masi miyo karowa, kinimoorumihelani yoowo.

Nto okathi owo vanrw’awe, owo onimwaakhupalihani atthu mwaha w’etampi, ni wa exariya, ni w’olamula:

Mwaha w’etampi, okhala wira khanikaamini miyo;

Mwaha w'exariya, okhala wira kinrowa wAtithi, ni nyuwo khamunikoona-tho;

Mwaha w'olamula okhala wira mukhulupale a vathi-va oolamuliwa.

⁶⁰ Wulu! Vano, Mulapeli, omphwanyaneya mwa—mwa Yohani 2:12. Vano nrowe nisome yeeyo, minuutu mmosa paahi, Yohani Oopacerya 2:12. Kileveleliwe, Yohani Oopacerya. . . 1 ni 2, ti yoowo. Kookhalana iya soolempwa sene, Yohani Oopacerya 2:1 mpakha 2.

An'aka, kinoolepelani, itthu iya, wira muhiireke etampi. Nto akhala onttheke, nookhalana mulapeli wa Atithi, Yesu Kristu yoowo ori naxariya:

T'ani okhanle Mulapeli? Yesu Kristu naxariya.

Nto owo ti—owo ti mukuttho w'olivela itampi sahu: ni kahiyo sawihu-ru paahi, nave-tho itampi s'atthu othene.

⁶¹ Eroho Yowarya exeenii? Ti Mulapeli. Exeeni mu. . . Mulapeli t'ani? Owo oniira-ni? Onoolapela. Onnimoriwa ikharari. Eyo, Eyo enkhalo voopuroni wanyu. Eyo, Eyo eniira itthu muhinwery'anyu wira. Eyo, Eyo ti—Eyo ti mukuttho wa itampi sanyu. Eyo ti exariya anyu. Eyo ti ovonihiwa wanyu. Eyo ti Ekumi anyu. Eyo ti ohihimuwa wanyu. Ti sothene Muluku orin'awe wa nyuwo. Owo ti Mulapeli.

⁶² Moota naakhanly'ahu ohimyaka kamosa-kamosa yeeyo ni okawanyasa, ya moota okathi Eyo—Eyo enxonttel'aya mwaha w'ohisuwela wahu. Imaara sikina okathi e. . . nirine-ene Eroho Yowarya, hiyo voohisuwela ninimwiikwattula mw'etthu. Eroho Yowarya eri vale wira enilapele. Eyo ti Mulapeli ahu. Eyo enkhalo yawihu. . . Eyo ti Mulapeli ahu. Eyo enkhalo vale ni oxonttela mwaha wa hiyo. Hiyo khaniniixonttela, okhala wira Eroho Yowarya mwa hiyo ennixonttela mwaha wa hiyo. Eroho Yowarya ennilavula, imaara sikina ni moolumo muhinwery'anyu wiiwa saana, ni Eyo ennixonttela mwaha wa hiyo. Ti yeeyo ekhanle Eroho Yowarya.

⁶³ Keettaka kikelaka mw'etthu p'itthu, ki—kineetta ntoko mwanamwane; muneetta ntoko mwaana mwamukhani. Hiyo, nineetta molumwenkuni mooriipela woosareya awanani, woosareya etampi, woosareya matapha, woosareya itthu sothene.

Nyuwo muniira, “Oh, kinnoova. Kinnoova othanla makhalelo a Ekristu. Miyo, kinnoova wira *ela*. Kinnoova wira kiniwmiira *ela*.”

Muhoove. Hiyo nookhalana Mulapeli. Amen. Oh, Owo onkhala vakhiviru ni hiyo. Owo ori mwa hiyo, ni Owo onnixonttela mwaha wa hiyo. Eroho Yowarya, voohihyererya, voohihyererya elapelaka mwaha wa hiyo, okathi wothenene. Eyo

ti Mulapeli ahu. Oh, moota onimuxukhuru-ahu Muluku mwaha wa yeeyo!

⁶⁴ Ekanyeryo, ethoonyeryo, Eroho y'Ekumi, Muluku a Wirimu, Mulipa-ookhaliherya, Ekumi, Mulapeli. Ti pani Uwo? Oh, wulu! Naamuwerya okelela ohoolo iwoora ni yeeyo.

⁶⁵ Vano ninrowa orukunxa minuutu mmosa paahi. Vano ninrowa okoha vano. . .

Noolaiheriwa mahiku ookiserya! Mulapeli ula, ekanyeryo, natiri, sothene silavunly'ahu sa Yoowo ohiy'ula, wa imaara ikonto muloko tho, Eyo niroolaiheriwa hiyo mahiku ookiserya.

Awo khayaarina Eyo mahiku ale. Awo yaarina ethoonyeryo v'erutthuni vaya, ntoko eneneeryo ni ethoonyeryo, yaaminiki wira Eyo yaamoowa, ni awo yeetta v'erukuni wa ikano. Yeeyo, awo yaalyihiwaaya masoma v'erutthuni.

⁶⁶ Olelo hiyo khanineetta v'erukuni wa ikano. Nineetta ni owerya wa ohihimuwa. Nineetta ni owerya wa Eroho, Yeeyo ekhanle ethoonyeryo ahu y'ekeekhai, Mulapeli ahu eekeekhai, Mulipa-ookhaliherya ahu eekeekhai, ethoonyeryo ahu y'ekeekhai nyariwaahu-mo Osulu; atthu, oomeekha ootikiniha, aniira vootikiniha, animukuxa Muluku mwa Masu Awe, aniihana itthu sothene sikina okhala soovonyeya. Masu a Muluku t'ekeekhai. Eyo e. . . Oh, wulu! Ti yeeyo ekhanle Eroho Yowarya.

⁶⁷ Munnitthuna Yeeyo? Khwamwaatthuna okhalana Yeeyo? [Muthukumano oniira, "Amen."—Mol.] Nrowe noone sinto yaahileiheriwa Yeeyo.

Vano nrowe nitthikele mwa Yesaya, Eliivuru ya Yesaya. Nrowe nikuxe kapiitulu 28 ya Yesaya. Vano ninrowa mwa Yesaya 28, ni ninrowa opacerya ntoko e. . . Nrowe nikuxe versiikulu 8, noone etthu Yesaya ohimaly'awe, iyaakha imiya thanu na piili ni muluko ni piili Eyo ehinathi orwa.

⁶⁸ Naamuwerya ohimya sinci-ene mwaha wa yeela, otthikela, wopaceryani, masi ninrowa opacerya vaava noone sinto Eyo yaahilaiheriwa Ekereja. Nihiku xeeni naatthuneya wira Eyo erwe? Ya mahiku ookiserya, okathi waarowaaya okhala o—ohononeya. Vano muupuwele, nuulumo nri mwa eyaattelo "mahiku," mahiku manli ookiserya, iyaakha ikonto piili sookiserya.

Vano, vano versiikulu 8.

Othene, *maana meesa othene aasareya so... soonanara, mpakha ohihala* nipuro nooreera.

⁶⁹ Mphavelase olelo wira mphwanye. Nwehawehe moone vakhala wira hiyo niri nihiku nenlo. "Meesa othene!" Vano, awo anoorowa w'Olyani w'Apwiya, nto etthu yoopacerya, mwa itthu s'erutthu, ankuxa nipatuuxa na mukatthe woopeepheya wala mukatthe wa soota, n'ukawanyasa n'upaka ekomunyawu.

Okathi, vantthuney'aya opakiwa ni matata a Eroho Yowarya, ni mukatthe woohikhalana miropo. Kristu kahiyo oonanara ni ootakhala, nto eyo enimuthoonyerya Yoowo.

⁷⁰ Etthu ekina, awo anaavaha atthu anhapaliwa, anootha, aniiya, animulya sikaro, animulya soona, (wish!) etthu p'itthu paahi, vakhalaru wira aniira mpantta wa ekereja. Nnakhala! Mutthu akuxa vale okathi ninly'ahu yeela va, owo onimumula ni onwurya ehukhumu awe, ahithokoreryaka Erutthu y'Apwiya. Owo aahitthareke makhalelo ooreera, ahikwannye.

Ni nyuwo mwaahikhuure, enooniherya wira murim'anyu ti woottheka. "Ole ohinlya, khorina mpantte ni Miyo," Yesu oohimya.

⁷¹ Masi meesa othene a Apwiya aasareya soonanara. Khanivo hata nipuro nimosa nooreera. Nwiryane, vakhala wira eyo khenlikana n'ulelo!

Tani ole...t'ani ole onrow'awe omwiixuttiha ankhili? ni t'ani onrow'awe omwiiriha...omutaphulela mwiixuttiho?...

...t'ani onrowa wiiwa ankhili?...t'ani onwery'awe omutaphulela mwiixuttiho?...

"Ahe, attotopeliwe Muluku, miyo ka muPrespiteriyaano. Miya ka Mmetotista. Miyo ka muPentekosite. Miya ka muNasareno. Miyo ka Nawetta a oSantu." Eyo khenihimya etthu wa Muluku; meesa makina.

...t'ani onrowaaka omutaphulela mwiixuttiho?...

⁷² Enamuna xeeni ya mwiixuttiho; Metotista, Patista, Prespiteriyaano, wa Pentekosite? Mwiixuttiho wa Bibilia!

...t'ani onrowaaka omutaphulela mwiixuttiho?...

⁷³ Munsuwela sayi okathi munkhalan'anyu Yeeyo? Ninookelela yeeyo Namathanu ohiyu. Munnona?

...t'ani onrowaaka omutaphulela mwiixuttiho? (vano nwehe) ale ahiihiwe waamwa, ni akumihwe vamapeleni.

⁷⁴ Anamwane axikhaani aniira, "Ahe, kinrowa okereja, ame aka yiiraka mpantta w'ekereja yeela." Miyo nkirina etthu y'ovirikanya eyo, munn'aka oophentiwa. Ni koosuwela wira ela enookaravariwa. Ti vooreera, mwiireke mpantta wa ekereja y'amaama. Masi, nwiryane, amaama yeetta moowaaryani mmosa, nyuwo muneetta moowaaryani mukina.

⁷⁵ Lutero eetta mowaaryani mmosa; Wesley eetta mukina. Wesley eetta mowaaryani mmosa; Pentekosite eetta mukina. Masi hiyo nineetta vasuluxa ovikana owo olelo. Ni nakhala nloko nikina, ninoonivikana hiyo.

⁷⁶ Ottuli mahiku a khalayi, okathi etthu yaary'aya yootaphuwa, yootaphuwa saana, Lutero iixuttiha okhalihwa naxariya

mwaha wo waamini. Eyo yaari wira yaaruuhe paahi athu okhuma oKatolika erowaka oPrustante, okela mopatthanani mwa Masu. Okhalihwiwa naxariya mwaha wo waamini, eyo waari munela wootaphuwa saana. Awo khayaakhumme mmo.

⁷⁷ Vale khurwa muhakalaliho mukina wiihaniwa John Wesley. Owo waahaatatha okhuma mme, khuruuha mpakha oreerihiwa, otthara makhalelo, ooreera, ooloka, ooreerihiwa ni Masu a Muluku, oruuha ohakalala mmurimani mwanyu. Owo waahitatha saana mwiixuttiho w'eLutero.

⁷⁸ Vano khurwa Pentekosite ni opatiiso wa Eroho Yowarya, vano khuvukuwa-tho, mwa waakhela Eroho Yowarya. Ti yeeyo.

Nto vano eyo yoopacerya otathiwa. Nto soovaha, ni wuuluuliwa, ni Eroho ya Muluku yookela, voomalela wa ithoonyeryo ni mitikiniho, muKereja, ni yoomutatha Pentekosite. Exeeni iyo? Niri vakhiviru wa Orwa wa Pwiya Yesu, mpakha Eroho yeeyo yaari mwa Yoowo envar'aya muteko muKereja, yiiraka itthu imosaru Owo iir'awe okathi waary'awe vathi va. Eyo khiyaatonko wiiraneya, okhuma okathi w'arummwa mpakha okathi ula.

Mwaha wa xeeni? Moone, yaari yootaphuwa; enavukuwa, enavukuwa, enavukuwa. Exeeni iyo? Eri ntoko ntata nanyu naattamelaka eruku; enekatiivu, nekatiivu, nekatiivu. Masi exeeni iyo? Eyo eyooniheryo. Lutero aari exeenii? Eyooniheryo ya Kristu. Wesley aari exeenii? Eyooniheryo ya Kristu.

⁷⁹ Nkawehani, okathi wa Billy Sunday onoomalaru. Nihiku nlo, mutokweene Dr. Whitney, ohiiixuttiha vapulpitu vaava, ookiserya w'ale a exikola ya khalayi, okhwiye, ni iyaakha soophiyaka miloko mithanu na mixexe, woona waka. Billy Sunday aari mulipa a muhakalaliho a ikereja sene mahiku awe. Owo khiinanela moolumo; aarimweemela vale khukhuwela, "Nyuwo aMetotista othene murukunuxe murima, alaleyi ni othene! Nyuwo aPatista othene murukunuxe murima! Nyuwo aPrespiteriyaano!" Owo khiinanela moolumo. Owo aari Billy Graham a mahiku awe.

⁸⁰ Nwehe. Vano nto, okathi ene yoowo ekereja ene yaakhalan'aya muhakalaliho aya, exeeni yiiraneieye? Ehapari yooreera Yoomalela yaakhalana muhakalaliho. Khukhumelela axinna Bosworth, Smith Wigglesworth, ni Dr. Price, Aimee McPherson, othene awo.

Nkawehani, Smith Wigglesworth okhwiye ohiyu uwo. Totori Price okhwiye voosiisu aya. Muhina mwa iwoora miloko miili ni xexe kaari vapuwani.

⁸¹ Vano emalelo aka enoophiya. Nkawehani e... Khamuniwaxa sa Billy Graham. Khamuniwaxa sa Oral Roberts. Kinnoona mithukumano saka sikelaka vamuuttutthini. Mulattu aya xeeni? Niri woomalelani, okathi mukina.

⁸² Billy Sunday aakenle sayi, n'akina? Awo yaakelanse omalakarumu hakalaliho muulupale wa Moody. Moody aakenle liini? Omalakarumu hakalaliho wa Knox. Knox aakenle liini? Omalakarumu hakalaliho wa Finney. Finney numala Kalvino, Kalvino numala. . . Vano, Wesley, nto Wesley numala Lutero. Orowaka ottharaka okathi. Vammal'aya muhakalaliho mmosa, Muluku oninvenxa mukina n'umwarexa-tho Waarya; ni onthhikela okelelaka ohoolo siiso.

⁸³ Vano hiyo niri woomalelani w'okathi ula. Khula mutthu onniwehererya Orwa wa Kristu woomalelani w'ehuhu awe, masi yaahikkhalana sinci-ene soowehererya; ohokolowa w'aYuta, iparatho iye sinvava osulu, itthu iyo sothene sinoon'ahu olelo. Masi hiyo nri woomalelani. Hiyo nri va vano. Awo yaanisuwela wira Ekereja yaarowa waakhela Owerya waarowa ovara muteko muKereja miteko imosaru sa Kristu, okhala wira okathi eruku enkhala'aya erii pelaka ni erii pelaka, ni enootepa wooneya.

⁸⁴ Nkoonani eruku. Mwaarakamelaxaka eruku, wooneela w'eruku onoovukuwa. Nuuvira okathi vakhani, eruku enkhala ekhuveelaka ekhuveelaka, mpakha mwiri n'eruku okhala etthu emosaru.

⁸⁵ Vano, Eroho ya Muluku yoovara muteko vathi va okhalihwi naxariya, vathi va Lutero; oreerihwi, vathi va Wesley; opatiiso wa Eroho Yowarya, vathi va Pentekosite; nto va Eyo eri nihiku nookiserya, epakaka ni yiiraka itthu imosaru Eyo yiiraly'aya okathi yaary'aya mwa Kristu. Exeeni iyo? Ekereja ni Kristu eri Mmosaru.

Nto Awo emalakarumu phitaana, nlutte nlo nookiserya, Eyo enoorowa osulu, ekhuwelaka. Onoohihimuwa Wesley, Lutero, ni othene akina aya ottuli mahiku ale wu, "oopacerya onookhala okiserya, ookiserya onookhala oopacerya," vano onimoorwa ohihimuwa.

⁸⁶ Hiyo niri okathi wa woomalelani. Nwiriyaane, ti yeeyo Eroho Yowarya eniir'aya. Eroho Yowarya, mwa okhalihwi naxariya, moone, eruku yooveya paahi ya Yeeyo; Eroho Yowarya, mwa oreerihwi, eruku yooriipela vakhani, ya Yeeyo; Eroho Yowarya, mwa opatiiso Aya, eruku yooriipelexa; vano Eroho Yowarya, mwa ohokoloxiwa wa Omutthu Aya eneene ori va, epakaka ithoonyeryo ni mitikiniho ntoko Eyo siiraly'aya wopaceryani. Whish! Ovuwa! Kinoorowa wihaniwa "santu oophirikeya," khula enamuna, vanreerela mpacerye naanaano va.

⁸⁷ Nwiriyaane, axinna, nwiriyaane ela.

. . . meesa othene aasareya marapheyo. . . kxanihanle
nipro nooreera.

T'ani ole onrow'awe omwiixuttiha ankhili? . . . t'ani
onrow'awe omusuweliha, omutaphulela mwiiixuttiho?
ale ahiihiwe waama, ni akumihiiwe vamapeleni.

Kahi anamwane axikhaani; anamwane maPrespiteriyaano, anamwane aMetotista, anamwane aPentekosite, anamwane aLuterano, anamwane aNasareeno. Owo ommutthuna mutthu onthuna ohiya mapele khunalya yolya yoolipa. Ela enoorwa va;

*Nikano vasulu va nikano, . . . vasulu va nikano;
yooruma vasulu va yooruma, . . . vasulu va yooruma;
va vakhani, ni vale vakhani:*

*Maana Miyo kinimwaalavulela atthu ala ni moolumo
ookukuma ni ilavulelo sikina.*

*Yaawo awo yaahimenry'aya wira, nno ti omumula
weiwo mukhanly'anyu waamumulihaka ale
akhulumunwe; ni wira ola murettele: masi atthu awo
khiyaatthunne wiiwa.*

⁸⁸ Eroho Yowarya, vakhala wira eyo kahiyo enamuna yaaruuly'aya Nihiku na Pentekosite, yaalaaleeriwe iyaakha imiya thanu na piili ni iyaakha muloko ni piili Eyo ehinatthi orwa! Eyo eri va Nihiku na Pentekosite, yaahirwa voolikana ene.

⁸⁹ Mutthu mmosa irale, "Othara nihiku n'esaapatu." Miyo nkinikhoota nnakhala othanya ekereja wala etini ya mutthu. Masi ehimye wira: "Nihiku n'esaapatu, esaapatu ya Muluku naari nihiku n'omumula."

Va nri nihiku n'omumula. [Munna Branham ommukuxa Bibilia awe—Mol.] "Ola t'ukhanle omumula," Owo ohimye wira, "mukhanly'anyu waamumulihaka." Ti yeeyo. Amen! "Enrowa okhala nikano vasulu va nikano, yooruma vasulu va yooruma." Va ti vari omumula. Eroho Yowarya exeenii? Omumula. Oh!

*Murwe wa miyo, nyuwo othene mulemeliwe ni
muhaaxiwe, nto miyo kinimoomumulihani.*

⁹⁰ Owo ti pani? Ole onrwa mwa nyuwo, onoovahani murettele; ethoonyeryo anyu, Mulipa-ookhaliherya anyu; ookhaliheriwa, mmumulaka, ootthittiwa.

⁹¹ Mumphwanyaneya sayi...? Eyo ethoonyeryo; atthu annisuwela wira yookhala etthu ewinreni. Exeeni Iyo? Ti Mulipa-ookhaliherya. Exeeni Iyo? Ethoonyeryo. Nyuwo munoomumula. Muhaana. . . Ti Mulapeli anyu. Vakhala, nyuwo, etthu enookhumelelani, yookhala Etthu vo wira elapele mwaha wa nyuwo naanaanoru, moone, oxonttela. Eyo Eroho ya Muluku enkhala muKereja, yaahimmwe vekeekhai etthu Eyo yaarowaaya okhala okathi waarowaaya orwa. Eyo yaarowa okhala omumula woohimala, wa Mahiku othene.

⁹² Muluku aapattunxe olumwenku. aHeperi, kapiitulu 4. "Muluku aapattunxe olumwenku, nto khumumula nihiku na neethanu nenli." Ti yeeyo.

Nihiku na neethanu neraru opacerya-tho paahi, vathi. . . Owo aahaavaha eyo aYuta ntoko waataana, mwa okathi

mmosa. Ti yeeyo. Masi awo anoorowa n'umumula nihiku nimosa; n'utthika, nihiku noopacerya n'esumana, anoopacerya-tho, vasya, opacerya-tho. Iwo kuhiyo omumula Muluku ohimaly'awe.

Okathi Muluku opattuxaly'awe olumwenku muhina mwa mahiku mathanu na mosa, okathi Owo oronwaawe omumula, Owo aamumunle okhuma vaavo mpakha ohoolo. Ti yeeyo. Eyo yaahimaliha mwaha. Owo khaatthinke nihiku na neethanu neraru opacerya-tho.

⁹³ Eyo yaari eruku paahi. Vano, ele yaari ethoonyeryo, ntoko mweeri ni nsuwa; masi okathi nimphattuwaaya nsuwa, hiyo khanintthuna-tho mweeri. Vano nwehe ela, oh, mwa Wiisuupulula 11, "Muthiyana inawu sawe anyakenleene mweeri, nto nsuwa vamuru vawe." Oh, naamuwerya orowa nimuttharaka Bibilia, okhuma ekaapa mpakha ekaapa, ni owoonihani. Munnona?

⁹⁴ Masi exeeni iyo? Okathi, Bibilia oohimya mwa aHeperi kapiitulu 4, "Vaakhanle wira Yesu aahaavaha nihiku n'omumula, Owo aamuhimya-tho nenlo ohoolo waya; Owo aamuhimya nihiku n'omumula." Nihiku xeeni Owo ohimaly'awe, omumula?

Murwe wa miyo, nyuwo othene mulemeliwe ni muhaaxiwe, miyo kinimoomumulihani.

⁹⁵ Matewu kapiitulu 11, versiikulu 22...Nkawehani, nto, ninnoona wira okathi onrwaahu wa Yoowo. "Maana ole," aahimya aHeperi 4, "ole ovolonwe m'omumulani mwa Yesu, oomumula miteko sawe sa molumenkuni, ntoko Muluku saamumunly'awe Sawawe," okathi Owo opattuxaly'awe olumwenku, wira ahitthikele-tho yoowo. Okathi xeeni? [Munna Branham ommana vapulpitu vaara vararu—Mol.] Okathi xeeni muntthittiwaanyu ni Eroho Yowarya? "Mpakha nihiku no woopoliwa wanyu." Vo ti vari omumula, ohakalala, Mulapeli, ekanyeryo, Nvuluxa. Oh! [Munna Branham ommana ikuphi omosa.] Kinnihakalala mwa enamuna emosa, wala ntoko waakhela eparakha. Oh!

⁹⁶ "Noolaiheriwa Yeeyo, Munna Branham? Ehoonihariwa ni Bibilia?"

Vaareera, nirowe mwa Yoweli, noone ele Yoweli ohimaly'awe wa Yeeyo.

Nkireere oxukhuru mwaha wa Masu a Muluku! Nyuwo munniphenta Yaawo? [Muthukumano oniira, "Amen."—Mol.] Kinoona wira yahaari mwaha wa Masu, nkisuwenle vaarowaahu ophwanyaneya. Vaareera.

Niri mwa Yoweli vano. Ninrowa mwa Yoweli, kapiitulu 2 ya Yoweli, nto ninrowa opacerya versiikulu 28. Yoweli 2:28, iyaakha

imiya thanu na tthaaru ohinatthi orwa Kristu, profeta mwa Eroho. Vano nwiiriyane.

Vano enimwiiraneya numala, miyo kinimwaamaraxela erooho aka atthu othene; . . . an'inyu axilopwana n'axithiyana anoolavula s'eprofeta, atthu oowuuluwala anooloha, ni amiravo anyu animoona soowoona:

Nave-tho arumeyi aka alopwana n'athiyana kinimwaamwaraxela mahiku ala . . . waamwaraxela, erooho aka, mahiku awo.

Ni kinimooniherya itthu sootikiniha wirimu osulu ni vathi va, ephome, . . . mooro, ni malumi a mwiixi.

Nsuwa nnoorukunuwa nikhale nooriipa, vano mweeri ntoko ephome, nihinatthi ophiya nihiku . . . nuulupale ni noowoopiha n'APWIYA.

Nto vanimwiiraneya, wira othene ale anrowa ovekela mwa nsina n'APWIYA animoopowa:

⁹⁷ Eyo e . . . Oh! Exeeni? Yoweli! Mooweha? Miteko 2, Petru aakunxe eversiikulu emosaru yeeyo. Khwira, “Atthu a Isarayeli, nwiiriyane moolumo aka. Atthu ala khahapaliwe,” atthu ala ootthittiwa, oohakalalihiwa, oomeekha, ootthittiwa. “Ala khahapaliwe, ntoko sinuupuwel'anyu,” Miteko 2, “maana nlelo iwoora tthaaru sa voosiisu. Masi ela t'ile yaahimmwe ni profeta Yoweli, wira, ‘Enimwiiraneya mahiku ookiserya Miyo kinimwaamwaraxela Eroho Aka atthu othene.’”

⁹⁸ Exeeni Iyo, Eroho Yowarya exeenii? Vaareera, vano nrowe niwehe-tho, alaiheriwe alipa-oowaamini, ti Yeeyo. Vano, Eroho Yowarya ela, ninimoona exeenii Iyo, minuutu mmosa paahi. T'ani alaiheriwe Yeeyo? Alipa-oowaamini.

Vano nirowe mwa Luka, kapiitulu 24 ya Luka, nwiiriyane etthu Yesu ohimmy'awe mwa Masu Awe ookiserya Owo ahinatthi okhuma elapo ya vathi. Luka kapiitulu 24. Nto nyuwo munlepa yeela vano, mulepeke, vano musome meelo mwakhalanaru okathi saana. Vano, Luka 24:49, munwiiriyane Yesu alavulaka. Wookiseryani, okathi Owo aawel'awe Movuwani, owela, ala ti Masu Owo aahimentry'awe awiixutti Awe.

. . . moone, miyo kinimoorumihelani natiri a Atithi . . .

Natiri xeeni? Ekanyero, ethoonyeryo, Mulipa-ookhaliherya, ni itthu iya sothene kihimaly'aka, imaara ikonto sene voowaatta.

. . . miyo kinimoorumihelani natiri a Atithi mwa nyuwo: . . .

Natiri xeeni? “Ole Yesaya aamuhimaly'awe wira aamoorwa, ‘Miyo kinimwaalavulela atthu ala ni moolumo ookukuma ni ilavulelo sikina.’ Kinimoorumihelani omumula weiwo mwa nyuwo. Kinoorumiha ele Yoweli aahimaly'awe, wira,

‘Enimwiiraneya mahiku ookiserya, onihimya Muluku, Miyo kinoomwarexa Eroho Aka mwa nyuwo.’ Oh, Miyo kinimoorumihelani, ni okhaliha maloko othene, atthu othene, opacerya oYerusalemu...Kinookeliha osuulu w’Abrahamu vathi va mwaataano ola. Kinoomutthitta khula mmosa a yaawo. Moone, Miyo kinoomwaraxa Eroho Aka.”

...Miyo *kinimoorumihelani natiri a Atithi aka mwa nyuwo: masi nyuwo muhaleke, enihimya, mulipelele mmuttettheni m’oYerusalemu, mpakha waakhela owerya okhumaka wirimu.*

⁹⁹ Eroho Yowarya exeenii nto? “Owerya onkhuma Wirimu!” Kahi owerya onkhuma wa pixipu, kahi owerya onkhuma mukereja. Masi, “Owerya onkhuma Wirimu!”

¹⁰⁰ Owerya iwo waarwiiye sayi? Mwaha wo “wiitakanxa mukereja”? Miyo kinootharimulani nyuwo mwiire, wira eyo ekeekhahi. Mwaha wo “wiitakanxa mukereja, ovahana matata ni mulaleyi”? Nnari, mulopwana. Vano, wa nyuwo aKatolika, “wookola nlumi nanyu ni waakhela ekomunyawu yoopacerya”? Nnari, mulopwana.

¹⁰¹ Owo waarwiiye sayi, Owerya okhumaka Wirimu? Nrowe nisome-tho vakhani. Nirowe mwa Miteko 1:8. Awo athukumanne vamosa vano. Vano yaalavula sa Yesu va, okathi waathukumann’aya vamosa, ni yaamurumm’aya mmosa wira akhale nipuro na Yuta. Miteko 1:8.

Nto nyuwo munimwaakhela owerya, nuumala yeela Eroho Yowarya enimookhuruwelani:

Exeenii? “Munimwiira mpantta wa Branham Tabernacle”? Nnari. “Munimwiira mpantta wa ekereja Metotista, ekereja Katolika, Prespiteriyaano”? Kahi siiso, mBibiliani. Owo mwiixuttiho woopakiwa n’atthu.

“Nto munimwaakhela Owerya nuumala okhala mulaleyi”? Nnari, mulopwana. “Munimwaakhela Owerya numala ophwana Ekharawu ya Paxareli”? Nnari, mulopwana. “Munimwa-...onoorwa Owerya numala ophwana DD anyu”? Nnari, mulopwana. “Munimwaakhela Owerya numala opatisiwa mmaasini”? Nnari, mulopwana. “Munimwaakhela Owerya numala waakhela ekomunyawu yoopacerya”? Nnari, mulopwana. Moone, sothene iyo itthu soopakiwa n’atthu.

¹⁰² Nwiriyanee ele Bibilia ehimmy’awe, ele Yesu ohimmy’awe.

...*munimwaakhela owerya, nuumala Eroho Yowarya wookhuruwelani: (Eroho Yowarya exeenii? Owerya) vano, nuumala yeela, munookhala anamoona... (“Nyuwo muloko nanli paahi, nyuwo anamoona oYerusalemu”?) ...nyuwo munookhala anamoon’aka wothene oYerusalemu, ...oYuteya, ...oSamariya, ni mpakha omalenle elapo. (Weiwo ohiphiwe-wo nlelo.)*

Nto vamanly'awe ohimya itthu iya, . . . vamanly'awe ohimya itthu iya, awo emuwehexexaka owo, owo aahiwelihiwa wirimu muneekuni ni aahaakheliwa . . . awo emoonaka.

103 Vano nirukunxe nikukhu, nwehe moolumo eeprofeta ala omaliheriwa.

Vaaphiyaly'aya nihiku na Pentekosite, awo yaari nimoso . . . awo othene yiira ethukumanne-ene nipuro nimoso.

“Nto naanaanoru pastore aahivolowa ni . . .”? Kookhuma mphironi vo, nkikhumale? “Naanaanoru namukuttho aahirwa waltaari”? Nnari.

Nto naanaanoru waahiiwanyeya oruma . . .

Kahi etthu yo waanyiherya paahi; Waari vaavo, oruma.

“Murumeyi aattamenle mukhora”? “Namukuttho aarina ekomunyawu, akhumaka nipuro noowaarya”? Nnari, kahi etthu ntoko siiso.

. . . waahiiwanyeya oruma okhumaka osulu . . . (Kahi onyakula wa inawu) . . . waahiiwanyeya oruma okhumaka osulu ntoko . . . ephoyo enoopa n'ikuru (Oh, wulu! Whish! . . . ? . . .) . . . yaasanrye mpa mothene awo mwaary'aya.

104 Eroho Yowarya exeenii? Va ti nipuro awo amphwanyaaya Owerya. Va ti nipuro vaatthuneya wira elipelele; va ti etthu yaakhumelenle vairaly'aya siiso. Sothene saahihimmwa khalayi ene, okhuma Maphattuwelo erowaka, okhuma Abrahamu mpakha va; Wira yaamurowa orwa, ni moota Eyo yaarowaaya orwa, ni iphwanyeryo saarowaaya oruuha. Exeeni Iyo? Yaalaiheriwe Ekereja, alipa-oowaamini.

. . . nto yaasanrye mpa mothene awo mwaary'aya.

Nto yaahaakhumelela malumi ookawanyeya ntoko . . . a mooro, ni yaanimmorela khula mmosa.

Othene aya yaahisareya Eroho Yowarya, vano yaahipacerya olavula ilavulelo sikina, ntoko Eroho Yowarya yaavah'aya wira elavuleke.

Vano ninrowa okelela yeeyo, Namathanu ohiyu. Ninrowa ohiyererya yeeyo mpakha vaavo, moone.

105 Eri sayi Yeeyo? Owo natiri wa Ekereja, natiri voomalela. Vaareera.

106 Vano, vano ninrowa oweha, awo vamanly'aya osarihiwa, awo yaatthittiwe mpakha liini? [Muthukumano oniira, “Mpakha nihiku no woopoliwa.”—Mol.]

Akavi mu arina Eroho Yowarya? Nrowe noone matat'anyu. Aakhalaxa arina Eroho Yowarya waavikana ale ahirina. Nintthuna wira mukhale mmosa a hiyo, munna mulopwana,

muthiyana. Mwasuwelaru saana wira exeeni Iyo, Eyo...Eyo Eroho ya Muluku enkhala mwa nyuwo, wira evareke miteko sa Muluku.

Okathi Muluku aarumihenly'awe Eroho Awe khula mmosa w'arumeyi Awe, khula mmosa wa maprofeta Awe, khula mmosa w'asomiha Awe, khula mmosa w'arummwa Awe, awo kweekwe yaamukhoottiwa molumwenkuni. Awo yaahimmwa okhala alolo, mwa khula okathi waakhanle. Hata okathi Paulo eemenly'awe ohoolo w'Akripa, owo iirale, "Ephiro eniihaniwa okawanyeya..." *Okawanyeya* exeenii? "Ololo." "Ephiro yeeyo awo aniihan'aya ololo, nikhuru n'alolo, eyo t'ephiro miyo kinimukokhorel'aka Muluku a axitiith'ihu." [Munna Branham ommana ikuphi omosa—Mol.] Kinnitthapa ohimyaka wira ka mmosa wa yaawo. Ayo, mulopwana. Ti yeeyo. Kinnitthapa ohimyaka wira ka mmosa wa yaawo.

¹⁰⁷ Vano, vamanly'aya Eroho Yowarya ela waakhuruwela, Eyo yaahaasiviha murima mpakha sothene saakhal'aya s'atthu othene. Eyo ekeekhai? Wulu, wulu, opatthana xeeni! Hiyo ninniipa esipo eyo imaara sikina, "Oh, opatthana xeeni! Oh, opuha xeeni wa Muluku!" Ti yeeyo. Awo khayaacaliwa, awo khayaacaliwa sinto n—nsuwa naanaarya wala nnari. Awo khayaavekela olili wa maluwa.

"Vano, kinimwaakhela Eroho Yowarya," atthu kamosa-kamosa t'anikiirela, "Mwenye Branham, mwakikupaliha-ru wira kinookhala namusurukhu imilyawu sene, mwakikupaliha-ru wira kinoophwanya ihimye sa patarooya, ni wira kinoophwanya mikoti sa eweero, ni miyo—miyo..." Moone, atthu aniixuttiha yeeyo, nto aniixuttiha etthu yoowotha. Muluku kholaihenrye itthu iyo.

¹⁰⁸ Mutthu oniphiiyerya waakhela Eroho Yowarya khancaliwa vakhala wira onoolola yolya, wala nnari. Khiivo envirikana wa yoowo. Owo mutthu onrowa Wirimu. Owo khon...Owo khorina malutte mu, nnakhala. Ti yeeyo. Owo khancala. Enoorwa, enrowa, khula etthu. Hata uulumeliwaka, oveehiwa. Opwetexa ottittimihiwa wanyu, muncaliwa ni xeeni? Nyuwo muneetta murowaka Movuwani! Aleluya! Maitho anyu animuweha Kristu, vano nyuwo munimweetta murowaka. Khamuncala etthu atthu anihimy'aya.

Ti yeeyo ekhanle Eroho Yowarya. Eyo Owerya, Eyo ekanyeryo, Eyo Mulipa-ookhaliherya, Eyo Mulapeli, Eyo ethoonyeryo. Oh wulu! Eyo mulipiheryo wira Muluku oowaakhelani.

Okathi xeeni kikuxaly'aka? Kookhalana-tho minuutu mithanu na miraru paahi. Vaareera. Mukihiye...Kookhalana Soolempwa sinci-ene va. Nkinkupali wira kinoowerya osoma, masi ninrowa—ninrowa wiilipiha sinwery'ahu.

109 Vano, mutthu vammal'awe osareya Eroho Yowarya, vanniweryaneya olupatthiwa ni itthu sikina omuhokoloxerya ottuli ni . . . Vano, owo khanrowa oxinttiwa, owo nlelo mwaana a Muluku, owo onookhala okathi wothene, okhala wira munitthittiwa mpakha liini? [Muthukumano oniira, "Mpakha nihiku no woopoliwa."—Mol.] Ti yeeyo. Ti yeeyo Bibilia ohimmy'awe.

110 Vano, numala awiixutti omaniwa, yaahinyemulasiwa, oveehiwa, ni sothene, awo yaahuupuwela wira waari okathi w'otthikela ottuli okathi vakhani. Nrowe nikhunle mi—Miteko kapiitulu 4, noone okathi awo . . . etthu yaakhumelenle. Vano ela ti yawinyu nyuwo atthu murina Yeeyo. Miteko kapiitulu 4.

Vano, Petru ni Yohani yaahimaniwa, khuheliwa mukhatteya, mwaha wo ovoniha, okhalana muteko wo ovoniha vamukhora va ekereja. Akavi ansuwela yeeyo? Aahikhala mulopwana mmosa aammaathale vaavo, aarakanle inawu sawe. Owo khaawerya weetta; aari siiso iyaakha miloko mixexe. Nto Petru khuvira vaavo. Nto owo khwira . . . khuvarela muhasa awe, wira aphwanye etthu y'ohela mmuhasani mwawe, wira alye.

Vano Petru khumooniha wira aari mulaleyi oosareya Eroho Yowarya, owo khaarina hata musurukhu. Owo khwira—owo khwira, "Nkirina eparatha nnakhala eweero." Moone, owo khaacaliwa ni seiyo. Masi owo aari yo—yoo pattuxiwa yaarowa Wirimu. Oh, moota kaatthun'aka nikhalanne-ene okathi w'okhalaxa mwa yeeyo okathi vakhani vaavo, moone. Owo aarowa Wirimu. Owo aari oohakalala. Owo aahikhalana Eroho. Owo aahikhalana Owerya. Owo aarimweetta khwira, "Nkirina eparatha nnakhala eweero, masi yeeyo erin'aka yeeyo kinimoovahani."

Voohihoverya wira mulopwan'owo iirale, "Murina exeeni, mulopwana?"

"Kirina waamini. Kirina etthu mmurimani mwaka kipancery'aka iyaakha muloko sivinre. Kaari empa y'osulu iwe, nto naanaanoru, anatiri othene Muluku aahimaly'awe . . . Kaaheetta ni Yesu Kristu iyaakha tthaaru ni nuusu. Kaahitoha ihopa ni Yoowo, kipurulaka ihopa. Kihiiira itthu iya soohiyana-hiyana. Ni kaahimooni Owo aavonihaka aretta. Miyo . . . Owo aanikhala akileelaka, 'Atithi ari mwa Miyo; masi Miyo karowaru, Eyo enimoorwa mwa nyuwo.' Vano, miyo nkaawerya osuwela saana yeeyo. Masi Owo khwira, 'Vano, nkinwehererya wira munoosuwela saana yeeyo.'"

Khamunsuwela saana itthu iya; nyuwo mwaakhele paahi. Miyo nlelo nkinsuwela saana. Ni muhikileele wira nyuwo munnisuwela; okhala wira, khamunsuwela. Munnona? Vano, nkinwerya osuwela saana Yeeyo, nkinwerya otaphulela Yeeyo; masi, etthu emosa paahi ensuwel'aka, miyo kihaana Yeeyo.

“Ahe, ahe,” nyuwo muniira, “eyo kahi etthu ya siyensiya.” Oh, vekeekhai ti yeeyo.

¹¹¹ Nkawehani maluuxu awo. Okathi Benjamim Franklin ophwanyaly’awe, owo iirale, “Koophwanya.” Owo khaasuwela etthu aarin’awe, masi aahikhalana. Nto kintthuna mutthu akileele ohiy’ula ele ekhanle eletrisitaati. Khensuweliwa nlelo exeeni, masi nookhalana. Amen. Eyo ekeekhaii. Khaavo mutthu onsuwela ele ekhanle eletrisitaati. Awo pooti ovarela muteko, opattiha, ovareliha mooro, ovariha muteko. Masi eni—enikumiherya ni ixeratoore, ikaruma piili sineetta vamosa so. Ennikumiherya yeeyo, nto ti yeeyo tu awo ansuwel’aya. Enoomukumiherya luuxu, ni erina ikuru muhina mwaya.

¹¹² Nto eyo eri ntoko Eroho ya Muluku. Mwakhalanaru ekaruma emosa, mukhanle nyuwo, ni ekaruma ekina okhanle Muluku; vano khuneettiha vamosa *siiso*, enoowiirelani etthu. Ti yeeyo. Enooruuha Waarya. Enooruuha Owerya. Nyuwo khamunsuwela exeeni Iyo, ni khamunkhalakhala musuwelaka exeeni Iyo, masi munoosuwela mwakhalana—ru Yeeyo. Eyo etthu emosa ekeekhai. Ni Eyo ti yawinyu. Ti yawinyu. Eyo ti elipiheryo. Ti yeeyo.

Waarya *iwo* onooniheryani? Yookhala elipiheryo. Iwo waarya.

Vano nwehe ela. Vano, nyuwo khamunsuwela exeeni Iyo.

¹¹³ Masi atthu ala yiirale, “Ahe,” awo ya . . . yaahimye wira etthu emosa yaanisuwela, “noosuwela wira awo t’ohisuwela etthu.” Akina—tho “alolo,” moone, ntoko saahimeeriw’awe mutthu a wAlemaanya. Munnona? Yiiriwe, “Ale t’ohisuwela etthu ni oohisoma. Masi awo yaahikhalasa ni Mutothi a ihopa ole, Kalapinter’ole iwe, oniihaniwa Yesu, kinimooleelani, okhala wira awo aniira itthu imosaru Owo oniir’awe.”

¹¹⁴ Ti yeeyo ekhanle Eroho Yowarya, ti Yesu akhalaka mwa mutothi a ihopa ohinsuwela etthu, kalapintero, wala etthu p’itthu, mulaleyi oohisuwela etthu, etthu p’itthu. Ti mutthu onthuna okhala oohisuwela etthu wa itthu sa molumwenkuni, ni omuhiya Yesu okela mwa yoowo, Eroho ya Muluku, ethoonyeryo, Mulipa—ookhaliherya. Owo khancaliwa ni ottittimihiwa; etthu emosa paahi onthun’awe Mulukuu.

¹¹⁵ Okathi Muluku aalakihiery’awe itthu, Owo iirale, “Nyuwo aLevi othene, Miyo koowiihanani kihookhalihani anamukuttho. Nto axinn’inyu othene, akina, mahimo muloko ni manli ni . . . mahimo makina muloko ni mmosa anrowa woolivakani sanamuloko.”

“Okathi, munihephaanyu ittanka thanu na xexe sa masa, mukumihe ettanka emosa mwaavahe aLevi. Mwaviriha ipwittipwitthi sanyu ni—nipuro nla, mukumihe yanamuloko. Voohicala yaakhanle—ene ekhaani, wala yuulupale, yooneneva, yootteethaya, eyo ti y’aLevi.

“Vano, aLevi, nyuwo mwaphwanya sothene iya, nto nyuwo nvahe sanamuloko, nave, w’Apwiya. Nvaheke mwaavulo w’othonyerya, miyaavulo s’otthuna, miyaavulo soohiyana-hiyana. Mwaavahe sanamuloko Apwiya.”

116 Khwira, “Moise, mpantte anyu, ti Miyo.” Oh, wulu! Owo iirale, “Miyo ka mpantte anyu woohakalaliha.”

Nto ti yeeyo ekhanle Eroho Yowarya wa Ekereja olelo. Nkirina eparatha nnakhala eweero, masi kirina Mpantte woohakalaliha. Aleluya! Osoma, nkinwerya hata osoma Eliivuru ila, masi kookhalana Mpantte woohakalaliha. Ti yooreera. Ekharawu ya totori, nkirina hata emosa; Ph.D wala LD, wala etthu ekina. Masi yookhala etthu kirin’aka, Mpantte woohakalaliha. Owo ti mpantte kintthun’aka. Owo ti mpantte Muluku onthun’awe wira mukhalane. Murihele ota itthu iya sikina, mittittimiho sothene ni itthu sothene sikina, nto mukhume mwaakhele Mpantte woohakalaliha wa Muluku.

117 Okhala wira, itthu murin’anyu sa vathi va, munrowa ohiya vaava mwaakhumaka. Masi mwakhalanaru Mpantte owo woohakalaliha, Owo onimoovenyihani vekeekhai. Hiyo kweekwe ninkuxa isekuuru, olelo, wira naavahe alipa anaavitha atthu ookhwa. Nrowe niphwanye Mpantte woohakalaliha wa Muluku, ni niphwanye ele Enihimuxa ohiya ele enivitha. Moosuwela, soopiili sinnivara muteko.

118 Vano nrowe noone.

*. . . vaataphuliwaaya, awo yaahirwa okumana
n’akhw’aya, . . .*

Kahi otthikela w’anamukuttho. Moone, eyo yooniherya wira yaahikhalanasa Yeeyo. Awo khiyaatthikelanse etthu ile ya khalayi, yooriiry, yookhaleleya tho, nnari; otthika ni wira, “Vano nkawehani va etthu awo aniirihaly’aya!” Nnari, nnari. Awo yaahikhalanasa akhw’aya. Yaari paahi oophiyaka etuusiya emosa a yaawo, masi awo yaari akhw’aya oophiyerya, nikuphi naamukhaani n’atthu.

. . . vaataphuliwaaya, . . .

Awo numala waamanasa ni owoopopiha, khwira, “Mwatthikelaru opatisa-tho mu Nsina na Yesu!” Wala, oh, kinihimya e . . . Ahe, ti yeeyo. Munnona? “Mwatthikelaru olaleya-tho mu Nsina na Yesu, khula etthu eniir’anyu, hiyo nnimoovarani!”

119 Khwira, “Whish, woopopihiwa xeeni woothukumeliha murima. Nrowe nirowe n’axinna akina.” Oh, ti siiso. Mwa wiiwanana sookhala ikuru. Mwa wiiwanana sookhala ikuru. Khwira, “Nrowe nirowe n’axinna akina noone ekhanly’ahu wira.”

120 Vano awo othene yaahirwa vamosa enahimiyasa misuwelelo soohiyana-hiyana.

*...vaataphuliwaaya, yaahirowa okumana
n'akhu'aya, khwaahimeerya sothene makhulupale a
anamukuttho ni mahumu saahimenryaya.*

*Vaiwaly'aya yeeyo, yahinvenxerya masu aya Muluku
othene aya, ...*

Vano nwiriyane etthu yaahimans'aya. Munwehe, mwaawehase, kahi otthika ni wira, "O..." etthu ekina ntoko, "O Pwiya, kinnoona othunku..." Nnari. Awo yaahoopowasa. Awo yaahisareya Eroho. Awo yaahikhalanasa Ekumi Ehinimala.

*...yaahivenxa masu aya...othene aya, yiraka,
Pwiya, nyuwo mwa Muluku, ...*

Amen! Okisivela eyo, Munna Palmer. Okisivela eyo.

*...nyuwo mwa Muluku (hiyo noosuwela eyo) ole
mpattunxe erimu, n'ilapo ya vathi, n'iphareya, n'itthu
sothene siri memmo:*

*Nyuwo ni moolumo a murumeyi anyu David...
moohimya, ...*

¹²¹ Vano nwehe, nyuwo munrowa waakhula, mwiire, "Vano, hiyo khanihiyo e..." Vano nyuwo munookhumela iwo mwiire, "Ahe, vano, Pwiya, vano nwehererye minuutu mmosa va. Awo khanreere okiveehasa!" Owo khahimye wira yaarowa wira yeeyo?

"Othene ale ankhala vooreera murima mwa Kristu Yesu anoophwanyana olupatthiwa."

"Ahe, moosuwela, mukhulupale aka okilenle wira akiphwanyaru..." Khehimmwe wira awo yaarowa ohimya yeeyo? "Ahe, moosuwela, nihiku nlo kaahirohiwa opwaro wa milattu, mwaha wa Yeeyo."

¹²² Owo khohimye wira, "Munooroihiwa ohoolo wa mamwene n'akhulupale, mwaha wa Nsina Naka. Muhiwela-vele etthu enrowaanyu ohimya, okhala wira khamuhiyo nyuwo munrowa olavulaka"? Kihooona yeeyo okhumelela nsana. "Eyo Eroho Yowarya enkhala mwa nyuwo; Eyo t'enrowa olavulaka." Moone, "Yeeyo." Ti yeeyo. Vaareera. "Muhiwela-vele muupuwelaka enrow'anyu ohimya."

*Pwiya, ni...Nyuwo ni yawinyu...moolumo a
murumeyi anyu David moohimya, Exeeni amalapo
wuukhuwaka, n'atthu wuupuwelaka etthu y'ethiru?*

*Mamwene a mulaponi ahiilikanyiherya, ni
makhulupale...yiiwanana waavirikanya Apwiya, ni
onvirikanya Kristu.*

*...vekeekhai, Pwiya, wira envirikanye mwan'inzu
oowaarya Yesu, yoowo mmureerihaly'anyu, Heroti,
ni Ponsio Pilato, n'Amalapo, n'atthu a Isarayeli, ...
yaahiiwanana vamosa,*

*Wira yiire sothene ntata nanyu ni othuna wanyu
suupuwenly'anyu khalayi ene wira siiriwe.*

Oh wulu! Okisivela eyo. “Pwiya, awo aniira etthu ene yeeyo Nyuwo mwaahimmy'anyu wira yaamwiira.” Bibilia ohimnye exeeni? “Mahiku ookiserya, anookhumelela anamaveeha; atthu oothipelela, oowiisoona, oosiveliwa soopuha ohiya opatthana ni Muluku; atthu ahinaataaniheya, oowootherya akhw'aya, oohisumaaliha, awanani a itthu sooreera; yooneyaka ntoko atthu oothunku, masi ekhoottaka...” Awo khanaroweke iwe waakhela Owerya: “. . .nuumala Eroho Yowarya ela wookhuruwelani.” “Yooneyaka ntoko atthu oothunku, masi ekhoottaka owerya waya nave: awo muheettaneke.” Ti yeeyo ekhanle Eroho Yowarya. Munnona?

. . .ele suupuwenly'anyu . . .wira yiiriwe.

*. . .vano, Pwiya, nweheke woopopiha waya: ni—ni
mwaavahe arumeyi anyu, wira hiyo nilaleyeke masu
anyu nihoovaka etthu,*

Oh, okisivela eyo! Mukumihe nikhuva nlo na mwalyakhu mwaakhele muthana w'ekeekhai mmo. Vano nwehe va.

. . .wira nilaleye masu anyu,

Mookole ntata nanyu wira nivonihe; . . .

Oh, munna! Axetwani khankhwa, masi Eroho Yowarya nnakhala. Munnona?

*. . .mookole ntata nanyu wira nivonihe; . . .wira
ithoonyeryo ni sootikiniha siiriwe mwa nsina na
mwan'inyu oowaarya Yesu.*

Munnoonaa etthu yaanyakulihanel'aya, khamunoonaa? Awo aniira etthu emosaru olelo, masi kheniphwanyiha etthu hata vakhani.

*Okathi vamaalinh'aya ovekela, opuro owo
waathukumanne aya waahitetereya; nto othene aya
yaahisareya Eroho Yowarya, ni . . .yaanilaleya masu a
Muluku ehoovaka etthu.*

¹²³ Whish! Wulu! Awo yaahikhalanasa etthu okathi yaarowans'aya iwe, khayaakhalanne? Natiri ohimnye wira ti yeeyo ekhanle Eroho Yowarya, woovahani ominyala, woovahani ohakalala, wootthittani, woovahani ethoonyeryo. Oh wulu!

¹²⁴ Nwiriyaane. Oh, kaatthuna nikhalanne-ene okathi, naamuwerya orowa ni Filipe w'aSamariya. Mwa Miteko 8:14; nyuwo othene munlepa. Awo yaahaakhelasa ohakalala wuulupale, awo yaahikhalanasa miteko suulupale s'ovoniha, masi yaahipatisiwa mu Nsina na Yesu Kristu. Masi yaahirummwa oYerusalemu, wira emurowele Petru; owo aahirwa khuwiixaatherya matata, vano awo yaahaakhela Eroho Yowarya. Miteko 8:14.

¹²⁵ Amalapo, aahikhala mmosa iihaniwa Kornelio. Owo aari mutthu mmosa ooreerexa murima, aaniliva sanamuloko, aahaatekela atthu isinakooka, aanimuttittimiha Muluku, aanimoova Muluku; mutthu mmosa ooreera murima, Prespiteriyaano ooloka, Mmetotista, muPatista, wala etthu ekina, moone, mutthu mmosa ooreera murima saana. Masi nihiku nimosa, Muluku khwira, “Ole t’oreera murima; tivo Miyo kinrowa omuroiha vamuthukumanoni. Kihaana omuroiha mulaleyi aka vaava amuhimeerye sa Yeeyo.” Vaareera.

Vano owo aahoona yoowoona, khwira, “Murowe oYoopi, munomphwanya mutthu mmosa oniihaniwa Simoni, nasapala. Ni ookhala mmosa, Simoni Petru, weiwo. Mmuruuhe wenzo; owo onimoochimeeryani ephiro ene, ‘okhala wira ohaakhela etthu.”

¹²⁶ Vano Petru eemenle-ene vale... Nto Kornelio aarowa omukokhorela mulaleyi yoole. Owo aamurowa. Masi Petru khwira, “Nvenye. Miyo ka mutthu ntoko nyuwo.”

“Vano Petru alavulaka Masu ala,” a moota awo yaathhikans’aya, wopaceryani o... Itthu imosaru seiyo kinlavul’aka, moota Muluku aalahenry’awe omwaraxa Eroho Yowarya. “Owo alavulaka Masu ala, Eroho Yowarya yaahaakhuruwela.” Whish! Ayo. Ti yeeyo ekhanle Eroho Yowarya, ale Eyo ekhanle yawaya. Khweeli. “Nto awo yaahisareya Eroho Yowarya.”

¹²⁷ Vano nwehe mwa aEfeso, aahikhala munna mmosa muPatista. Owo aari mulapeli toko, mulavilavi, mutthu mmosa oosuwela, aanisuwela malamulo; mutthu muulupale, oosoma. Nihiku nimosa owo khunamusoma Bibilia, nto aahoona wira aamurwa mmosa aarowa wiianiwa Mesiya. Nto voonaly’awe yeeyo, vano, owo khupacerya wiiwa sa Yesu yoola, nto owo khwira, “Kookupali. Nto voohikhuwa kinnihimya waamini waka wira Yesu ti Kristu, Mwaana a Muluku.” Owo aari muPatista eekeekhai. Owo khunarwa va, “Voohikhuwa kinnihimya wira Yesu ti Kristu.” Owo khwiira vanci-enexa mpakha Muluku omwiihanela muteko w’olaleerya. Muluku kweekwe onoolavula ni murima w’exariya.

¹²⁸ Ni aahikhala mmosa aapakasa iheema iwe iihaniwa Akila ni Prisila, iya ni mwaara. Awo yaapakasa iheema. Miteko kapiitulu 18, onnohimeeryani yeeyo. Paulo, awo yaari apathani awe. Awo yaahaakhelasa Eroho Yowarya mmatatani mwa Paulo ni mwixuttiho awe.

Awo yaarimwiiwa wira waahikhala muhakalaliho iwe, vano khurowasa weiwo. Yaari atthu oophiyaka muloko wala muloko nanli yiira mpantta. Vano owo khurowa weiwo wira awehe, nto khumwiiwa mulaleyi ula alaleyaka, v’exariya ya mmurimani mwawe. Owo khwira, “Moosuwela, kookupali wira onimwiiwa Ekeekhai.”

Vano vamanly'aya muteko, owo khumwiihana wiithela w'eheema, khwira, "Nkawehani, nookhalana munna mmosa mwaamukhaani oorakama vakhani, muYuta mmosa mukhaani ookhoropana ephula, ni, masi owo arwa vale, onimooxuttihani Masu a Muluku, oratteene." Ahe, nuuvira okathi vakhani . . .

¹²⁹ Paulo aari mukhatteya okathi ene yoowo. Nipuro nooopiha wa mulaleyi a naanaano, kahi siiso? Masi owo aari mukhatteya, ni Apwiya yaarina memmo. Vano varwiiy'aya etetere, khuttikinya ekhatteya, owo aahimukuxa mulipa-oowehererya ekhatteya n'itthoko awe khwaapatisa othene, mu Nsina n'Apwiya Yesu, khukhuma, khurwa nno.

Nto owo ammalaru omoomola xetwani, mwa mwali mmosa iwe aaxeryaka ihako. Vano, nto, athu yaaniphwanya musurukhu mwaha wa yoowo, tivo tivo khooniherya ethepyelo aya, tivo nto awo khumuhela mukhatteya mwaha wa yeeyo. Vano Apwiya khuttikinya ekhatteya, 'okhala wira owo aahikhalana nikhuru n'athu iwe wira yiiwe Ekeekhai. Khamukhanle otthukaka Masu a Muluku. Yookhala...Hata wira, khamunwerya. Khamunwerya wira.

¹³⁰ Tivo owo aahirwa nipuro vaari mulopwan'ola. Nto Akila ni Prisila, khino awo yaahikhalanasa mikatthe kamosa-kamosa. Nto naanaanoru vakhuuriwaaya mikatthe iyo, khwira, "Ninoorowa omuhakalalihoni."

Paulo khukhala ottuli iwe khuvarela mukhumi awe mwaamukhaani, khunwiryana mulaleyi muPatista ola olaleya.

Owo khwira, "Ti yoolikana, etthu enlaley'anyu, masi yookhala-tho ya Yeeyo." Khwira, "Kintthuna kookoheni etthu, Dr. Apolo. Muhaakhela Eroho Yowarya okhuma okathi mwaaminni anyu?"

"Oh," owo khwira, "hiyo khanaasuwela wira yookhala. Munihimya exeeni, ni 'Eroho Yowarya'? Hiyo n'aPatista."

Khwira, "Munsuwela sayi wira mw'aPatista?" Munnona?

"Ahe, hiyo noopatisiwa. Hiyo ninsuwela opatiiso wa Yohani paahi."

Owo khwira, "Owo aapatisa mwaha wo orukunuxa murima, ahimiyaka wira 'mmwaamini Ole aarowa orwa,' okhanle Yesu Kristu."

Vano owo vaiwaly'awe yeela, awo yaahipatisiwa, mu Nsina na Yesu Kristu. Nto Paulo khuwiixaatherya matata, vano Eroho Yowarya khwaakhuruwela, nto khulavula ilavulelo n'ulaleerya s'eprofeta. Khwira, "othene ole," vano.

¹³¹ Vano niniira sayi? Kintthuna kooleleni etthu emosa, nto miyo . . .Ninoomaliha, 'okhala wira, ti, kihoolelani wira kaamoohiyani okhuma vahixiye. Moosuwela ele ekhanle Eroho Yowarya. Ntoko Yoolempwa yookiserya y'ohiy'ula . . . Kookhalana soowaatta sikina va, masi kihaana ohiya iyo. Nrowe

nikhunle aKorinto Oopacerya 12. Vano nto ninrowa osoma ela, vano nto nino—ninoomaliha. Vaareera. aKorinto Oopacerya, kapiitulu 12.

Akavi anaamini mwiixuttiho wa Paulo Oowaarya? [Muthukumano oniira, “Amen.”—Mol.] Vekeekhai! Owo oohimya, mwa aKalasiya 1:8, “Nakhala Nlaikha niniixuttiha etthu p’itthu yoovirikana, nitakhaliwe,” vaatepa mulaleyi. “Nakhala Nlaikha ninkhuma Wirimu ninkhuruwa ni wiixuttiha etthu p’itthu yoovirikana, nitakhaliwe.” Moone, muhikhale ni naata n’iyo.

¹³² Vano nwehe ela, aKorinto Oopacerya 12. Aka—akavi anuwela wira nihaana okhala mwa Kristu wira nirowe mohihimuwani, okhala wira ti Erutthu Awe Muluku olaihenry’awe ohihimuxa? [Muthukumano oniira, “Amen.”—Mol.] Khiivo enamuna ekina. Khiivo enamuna ekina, mwakhalaru ota wa Kristu.

Nyuwo pooti oweha ottuli *nno* ni omwaamini Yoowo, ni wira, “Tthiri, miyo kinnimwaamini Yoowo. Owo Mwaana a Muluku.” Oreera, munn’aka, koolikana wira kivahane ntata ni nyuwo mwaahimiyaka-ru yeeyo. “Kinnimwaamini Yoowo. Kinoomuhimya Owo okhala Moopoli aka.” Eyo ti yooreera, masi nlelo khamunakhale mwa Yoowo. “Kinoovahana matata ni mulaleyi. Kinoolapa itampi saka.” Eyo nlelo kuhiyo okhala mwa Yoowo.

¹³³ Vano nwehe, moone etthu Paulo ehimaly’awe, moota munkel’anyu mwa Kristu. Munrowa osuweliwa sayi ntoko oolyihiwa masoma? Abrahamu, aahivahiwa ethoonyeryo. Nwiriyaane ela vano, aKorinto Oopacerya, kapiitulu 12, nto nrowe nipacerye versiikulu 12.

Ntoko erutthu eryaya emosaru, yookhalana mipantte sinci-ene, ni sothene... mipantte s’erutthu yeeyo emosaru, sikhlanle-ru sinci-ene, sinkhala erutthu emosa: siiso-tho ti Kristu. (Oohikawanyeya. “Mmosa!”)

Nwiriyaane. “Mwa ekereja emosa”? Akavi ansoma ekittharaka? “Mwa ovahana ntata”? “Mwa maasi mamosaru”? Nnari. Vano ookhala ovonnye.

“Mwa Eroho emosa-ru!” Ti eleetera yuulupale? Eyo, “Eroho Yowarya,” nto. Munnona?

...mwa Eroho emosa-ru othene ahu noopatisiwa nuupeyaka erutthu emosa, hata nikhhalaka aYuta wala Amalapo, hata nikhhalaka epotha wala ootaphuwa; ni niwurihiwe Eroho emosa-ru.

¹³⁴ Erutthu ya Kristu Eroho emosa-ru, vaavo khula mutthu, okhuma Pentekosite mpakha okathi ula, onwury’awe Eviinyu esya yeeyo, Eroho Yowarya emosa-ru, ekumiheryaka

iphwanyeryo imosa-ru. Niniira sayi yeeyo? “Mwa Eroho emosa-ru.”

Owo mukhora wa Muluku woohuliwa, Eroho Yowarya. Exeeni Iyo? Owo mukhora wa Muluku woohuliwa. Eyo ethoonyeryo, Eyo ekanyeryo. Eyo ti Mulipa-ookhaliherya. Eyo ti Mulapeli. Eyo ti elipiheryo. Eyo ti omumula. Eyo murettele. Eyo oreera murima. Eyo ovonihwiwa. Eyo Ekumii. Owo—Owo mukhora wa Muluku woohuliwa wa itthu iya sothene. Owo mukhora wa Muluku woohuliwa w’orowa wa Kristu, yoowo orina . . .

Muluku ohooniherya wira Owo oomuhihimuxa Kristu mw’alipa-ookhwa, vano othene ale akhwiye mwa Kristu Muluku onimwaahihimuxa ni Yoowo wohihimuwani. “Muhiriipihe murima Eroho Yowarya yeeyo mutthittiwaanyu ekanyeryo mwa Kristu mpakha nihiku no woopoliwa wanyu.” Whish! Akavi anaamini yeeyo? [Muthukumano oniira, “Amen.”—Mol.]

¹³⁵ Kristu exeenii? Eroho Yowarya exeenii? Kehiyo etthu atthu anthey’aya. Eyo etthu atthu anthey’aya; masi kehiyo, wa mulipa-oowaamini.

Wa mulipa-oohaamini! Kaanitthuna kikhalanne-ene isumana piili wala tthaaru sootaphuwa, kaanitthuna kikunxe-ene meelo ohiyu ni wooleelani exeeni Iyo wa mulipa-oohaamini. Mukihiye kirowele va, okathi vakhani paahi. Eyo niwoko n’otheya. Eyo ntapha. Eyo nluke nookwattula. Eyo okhwa. Eyo ovalaanyana Woohimala ni Muluku. Nkinwerya wuupuwela itthu Eyo ekhanly’aya wa mulipa-oohaamini!

¹³⁶ Muupuwele, epula emosaru mulipa-oohaamini aaveeh’awe, yaari epula yeeyo yaamooonle Nowe n’amusi awe. Munnona? Eroho emosa-ru, Eroho Yowarya atthu anveeh’aya ni wira “ololo, ni nikhuru n’alolo, Eyo ovahuwa,” Eyo etthu emosa-ru enrowa Okuxa Ekereja n’uroiha osulu mahiku ookiserya; enrowa omuruuhela ehukhumu mulipa-oohaamini. Ti yeeyo. Ti yeeyo ekhanle Eroho Yowarya.

¹³⁷ Ooreeriwa t’ale. . . Mukihiye kihimye ela, n’ixariya mmurimani mwaka. Ooreeriwa t’ale anvoliwa etala ni ntthona mwaha wa Yeeyo, maana anoovona.

¹³⁸ Meelo ohiyu ninrowa olavula moota, etthu eniir’aya Eyo yarwa vale.

¹³⁹ Vano, akavi mu yaatthuna wira yaakhele Eroho Yowarya, ni munthuna wira mutthu oovekeleleni, wira moone Waarya?

Moosuwela “exeeni Iyo.”

Vano, meelo ohiyu, ninrowa okuxa, “etthu Eyo eniir’aya.”

¹⁴⁰ Vano nto ohiyu mukina, ti, “moota wo waakhela Yeeyo.” Numala ninrowa owiihana, atthu va wira yiixuttihiwe, ni wira erowe musaala ekhale weiwo, vakhala wira enikuxa Natale othene, ti yooreera, mpakha Eroho Yowarya orwa. Ninrowa

olavula Eyo ni mulipiheryo, wooreera wa Bibilia. Ninrowa olavula ni waakhela siiso Muluku olaihenry'awe Yeeyo, ni moota yaakhurunwaaya wopaceryani. Eyo t'inamuna nikhalenly'ahu va wira niire. Miyo . . . Khivanvirikana etthu p'itthu enihimy'aya, hiyo na . . .

Masu a Muluku ti . . . t'akhanle maalupale mmurimani mwaka. Eyo ekeekhahi. Ni kintthuna ele Muluku orin'awe wa miyo. Yaakhanle-ene etthu ekina tho, mutthukule Erimu, Pwiya, 'okhala wira mu—murim'aka wootthukuwa wa yeeyo. Ti yeeyo.

¹⁴¹ Akavi antthuna Yeeyo? Vano nvenxe ntata, mwiire, "Mukivekelele." Vano, murine-ene, matat'anyu osulu.

Tithi a Wirimu, nihiixuttiha okathi munci-ene. Masi Eroho Anyu eri vaava. Aakhala matata avenxiwe naanaano va. Vano annisuwela exeeni Iyo, awo annisuwela ele enihimya Eroho Yowarya. Miyo kinvekela, Muluku, wira muthukuman'ola ohinatthi omala, wira khula ntata mu nivenxiwe wira ahaakhela Yeeyo. Munivahe, Pwiya.

¹⁴² Hiyo ninnaavekelela. Ninoovekelani Nyuwo wira mwaareerihe, ni mwaavahe entthuna murim'aya. Nkawehani matat'aya, Pwiya. Awo annoophentani. Awo annitthuna Eyo. Aasuwela wira khanwerya orowa . . . Meelo ohiyu, Nyuwo mwakikhaliherya vale, Pwiya, ninoowerya wooniherya mwa Soolempwa wira awo khanrowa Okuxiwa ehikhalanne Yeeyo. Tivo kinnivekela, Tithi, wira Nyuwo mwaavahe ovoliwa etala ni ntthona, wira esarihiwe. Miyo kinaaruha wa Nyuwo vano, Tithi. Ni, mwaavahe iparackha iya, maana ninvekela mwa Nsina na Yesu. Amen.

Miyo kinnimpenta Owo, miyo kinnimpenta
Owo.

Okhala wira Owo t'opacenre okiphenta miyo
Nto oothuma woopowa waka
Vamwirini w'oKalvario.

¹⁴³ Kintthuna kihimye ela nihinatthi wiipa-tho. Kintthuna kithukumane ni nyuwo nikhuru n'arumeyi musaala mu, Namathanu ohiyu, muteko w'okokhorela ohinatthi opacerya, moone, Namathanu ohiyu. Miyo . . .

Munnoona emphavel'aka wira? Wooniherya Eyo exeenii, moota wo olavula sa Yeeyo ni etthu y'ottittimiha; vano khamunoorwa muhoonaka, mmanaka etthu. Tivo miyo kihivekenly'aka ohiy'ula. Kintthuna wira musuwele exeeni Iyo. Owo natirii. Eyo ethoonyeryo. Eyo Mulipa-ookhaliherya. Ti sothene iyo.

Vano, meelo ohiyu ni ohiyu onttarelana, nto ninrowa opacerya nto, okhuma vaavo nirowaka, mpakha Eyo orwa. Muhicaliwe okathi xeeni enrowaaya okuxa; ninookhala mpakha. Mureerihe murim'anyu. Owo khoniyeeherya Eyo murima

woonanara. Mukhale saana, mukhale oolikana, nto Owo onimoovahani.

Miyo kinnimpheenta Owo, miyo kinnimpheenta
Owo (nrowe nivenxe matata vano)
Okhala wira Owo t'opacetre okiphenta miyo
Nto oothuma woopowa waka
Vamwirini w'oKalvario.

Pastore onoomalaru ohimya, ni hiyo nookupali, wira meelo ohiyu ninrowa opacerya okathi wa iwoora ya thanu na piili ohiya thanu na piili ni minuutu miloko miraru. Ni eyo enookiiriha woohiyani okhuma iwoora thanu na tthaaru ni minuutu miloko miraru ohiya thanu na xexe ni minuutu miloko miraru. Thanu na piili milo- . . .Ewoora yaneethanu nenli, meelo ohiyu, muteko wa isipo onoopacerya. Kinoopacerya Mutthaka aka ewoora yaneethanu nenli ni minuutu miloko miraru.

Miyo kinnimpheenta Owo,
Nrowe nikumihe maleeso ahu nimukhomase Yoowo.

Miyo kinnimpheenta Owo
Muhiye okhaleleya iwo vano!
Okhala wira Owo t'opacetre okiphenta miyo
Nto oothuma woopowa waka
Vamwirini w'oKalvario.

Vaareera, pastore anyu vano, Munna Neville.



EROHO YOWARYA EXEENII? EMK59-1216
(What Is The Holy Ghost?)

ETTHARANELO YA MITTHAKA SA EROHO YOWARYA

Mutthak'ola wa Munna William Marrion Branham, opaceryawene olaleeriwe ni Enkelesi Namararu ohiyu, mahiku yeettaka 16 mweri wa Dezembro, 1959, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org